


禮書


五十三之六十四




漢書門			
八	二	六	〇
類	號	函	架
一	六	八	二
冊	架	函	號

內閣文庫			
二	七	四	函
一	六	〇	冊
架	冊	號	類
漢	書	八	二
六	〇	二	六

內閣文庫	
番號	漢 8260
冊數	16 (9)
函號	274 83







禮書卷第五十三

淺草文庫




宋 陳祥道用之 編

明 張 溥西銘 閱

盛 順順伯 叅

大琮

玉人曰大琮十有二寸射四寸厚寸是謂內鎮宗
后守之鄭氏曰琮體八方射其外鉏牙賈公彥曰
八角鋒各出二寸兩相并四寸也然地體方而四
隅有維蓋所射者四角而已考工記曰土以黃其
象方則八角之說未之聞也天子鎮圭以禮鬼神



宗后內鎮其用無所經見不可考也禮大圭不瑑而大琮謂之內鎮蓋亦刻鎮山以為飾而與大圭不類也夫王尊而不親故為天下之所君后親而不尊故為天下之所宗觀祀天以璧祭地以琮則后固有宗道矣故謂之宗后

王駟琮

后駟琮

玉人駟琮五寸宗后以為權駟琮七寸臯寸有半寸天子以為權鄭司農云以為權故有臯也鄭康成云駟讀為組以組繫之因名焉然則駟琮與駟

圭璋璧琮之駟同以為權則與璧羨起度之意同璧羨起度而度不以璧駟琮起權而權不以琮書言關石和鈞月令言正權石荀卿言衡石稱懸此權不以琮而以石也班固言圍而環之令肉倍好此權不以琮之方而以圓也禮曰天子與后猶日之與月陰之與陽相須而後成者也故建國則王立朝后立市祭祀則王耕以共粢盛后蠶以為祭服王獻尸后亞裸王親牽射牲后親薦豆籩賓客則王裸獻后亞之王致酒后致飲玉亦王有鎮后有內鎮王有駟琮七寸后有駟琮五寸駟琮以為

禮書 卷五十三
權而后有之者以其立市故也

上公桓圭

侯信圭

伯躬圭

子穀璧

男蒲璧

書曰輯五瑞脩五玉如五器卒乃復周禮大宗伯以玉作六瑞以等邦國公執桓圭侯執信圭伯執躬圭子執穀璧男執蒲璧典瑞公執桓圭侯執信圭伯執躬圭子執穀璧男執蒲璧

纁皆二采再就以朝覲宗遇會同于王諸侯相見亦如之小行人成六瑞公用桓圭侯用信圭伯用躬圭子用穀璧男用蒲璧玉人命圭九寸謂之桓圭公守之命圭七寸謂之信圭侯守之命圭七寸謂之躬圭伯守之雜記曰圭公九寸侯伯七寸博三寸厚半寸剡上左右各寸半鄭氏曰公二王之後及王之上公雙植謂之桓桓宮室之象所以安其上也信當為身身與躬圭蓋皆象以人形為琢飾文有麤縵耳欲其植行以保身也穀所以養人蒲為席所以安人璧皆徑五寸不執圭者未成國

也。蓋桓強立不撓而以安上為任。故公圭瑒之身。伸而躬屈伸者尊。足以侯外而蔽內。屈者卑。足以長人而已。故侯伯之圭瑒之子不足於長人。而可以養人。故璧瑒以穀。男不足於養人。而可以安人。故璧瑒以蒲。圭者天之用。璧者天之體。盡其用者必盡其體。得其體未必盡其用。此圭璧所以不同也。然王之三公八命。其服七章之鷩冕。其執七寸之信圭。及大射則王服鷩冕。故公降服鷩冕。降服鷩冕則執躬圭而已。此禮所謂曲而殺也。五玉亦謂之五器。亦謂之五瑞。亦謂之摯。左氏曰。男摯人者玉帛。大

宗伯作六瑞。自王以下皆言執。小行人成六瑞。自王以下皆言用。則執者自人言之也。用者自王言之也。執之所以行禮。用之所以合符。宗伯典瑞。行人皆言執。特小行人言用。則行禮非小行人所專掌。特掌其合符之事而已。若夫不施於行禮。合符則寶而守之。此玉人所以又言守之也。覲禮侯氏入門坐奠圭。拜取圭升致命。王受之。玉侯氏降。擯者延之。升成拜乃出。蓋於是時安玉崇玷之上。明堂位所謂崇玷康圭者。此也。若夫壇壝宮之禮。則諸侯升受王玉。王授之於宰矣。賈公彥曰。壇土無

玷當約聘禮側授宰玉其說或然易曰艮其身止諸躬也爾雅曰身我也躬身也蓋屈身為躬信躬為身言信圭則身可知鄭氏改信為身不必然也桓說文作獻

介圭

書曰太保承介圭上宗奉同瑁詩崧高曰錫爾介圭以作爾寶韓奕曰以其介圭入覲于王爾雅曰介大也又曰圭大尺有二寸謂之玠夫王之圭長三尺則尺有二寸所以錫諸侯者也諸侯之圭長不過九寸錫以尺有二寸使寶之而已書於介

圭言太保承之於瑁言上宗奉之書之介圭即大圭也王朝日執鎮圭搢大圭見諸侯則執瑁圭而大圭不搢則太保承之耳此承與奉所以不同也孔安國以書之介圭為王之守圭長尺二寸者毛氏以崧高韓奕之介圭為公之守圭九寸者鄭氏以崧高之介圭為所錫之圭尺二寸者以韓奕之介圭為享玉者然王與公之守圭曰鎮圭桓圭而已不謂之介其義當從鄭氏之說

王纁 五采 五就

公侯伯纁 三采 三就

子男纁

朱綠二采再就

聘王纁

三采六就

問諸侯纁

二采再就

典瑞王摺大圭執鎮圭纁藉五采五就公執桓圭
 侯執信圭伯執躬圭纁皆三采三就子執穀璧男
 執蒲璧纁皆二采再就瑑圭璋璧琮纁皆二采一
 就以覲聘玉人琬圭九寸而纁以象德大璋中璋
 九寸邊璋七寸有纁雜記贊行人曰圭公九寸侯
 伯七寸子男五寸博三寸厚半寸刻上左右各寸
 半玉也藻三采六等

藻薦玉者也三采六等以朱白蒼畫之再行也子男執璧

作此贊者失之矣

覲禮侯氏奠圭于纁上聘禮記曰所以

朝天子圭與纁皆九寸刻上寸半厚半寸博三寸
 纁三采六等朱白蒼問諸侯朱綠纁八寸皆玄纁
 繫長尺絢組又曰凡執玉無藉者襲曲禮執玉有
 藉者則裼無藉則襲左氏曰藻率鞞鞞昭其數也
 鄭氏謂纁所藉玉以韋衣木而畫之廣袤如其玉
 之大小一匝為一就蓋玉之藉以纁而纁之長祗
 玉采以象德之文就以象文之成君子以貞剛之
 質存乎內而以柔順藉之於外又有文焉然後可
 以行禮矣玉五采五就色不過五也公侯伯皆三

采三就降殺以兩也。子男二采而大夫聘王亦二采者禮窮則同也。纁或作藻。冕纁織絲爲之。則圭纁亦然。鄭氏與杜預皆謂以韋爲之。亡據也。纁可垂。可屈則廣於玉矣。鄭氏謂各眡其玉之大小亦亡據也。雜記贊行人曰。圭公九寸。侯伯七寸。子男五寸。博三寸。厚半寸。刻上左右各寸半。玉也。藻三采六等。然子男執璧。則博刻者公侯伯之圭而已。子男之纁三采再就。則三采六等者公侯伯之纁而已。鄭氏曰。作此贊者失之矣。其說是也。然則圭纁皆有組以繫之。聘禮所謂皆玄纁繫長尺。絢組

是也。璧纁蓋亦然。春秋傳所謂楚康王再拜皆厭璧紐是也。先儒以垂纁爲有藉。屈纁爲無藉。此說非也。考之於禮。王有以纁爲之。藉有以束帛爲之。藉有藉則裼無藉則襲。特施於束帛而已。聘禮賓襲執圭。公襲受玉。及享則賓裼奉束帛。加璧蓋。聘特用玉。而其禮嚴。享藉以帛。而其禮殺。此裼襲所以不同。玉人曰。天子圭中必則與纁之絢組異矣。先儒以絢組爲必是必者。人有之也。豈禮意哉。國語曰。大采朝日。少采夕月。韋昭謂朝日纁五采。夕月三采。

禮書卷第五十三終

禮書卷第五十四

宋 陳祥道用之 編

明 張 溥西銘 閱

盛 順順伯 叅

四圭有邸

蒼璧

大宗伯蒼璧禮天黃琮禮地典瑞四圭有邸以祀
天旅上帝兩圭有邸以祀地旅四望主人四圭尺
有二寸以祀天兩圭五寸有邸以祀地旅四望鄭
氏謂蒼璧禮天冬至祀天皇帝在北極者也四

圭祀天夏至祀感生帝於南郊者黃琮禮地者崑崙之示兩圭祀地者神州之示賈公彥謂黃琮以禮崑崙之示於夏至則兩圭以祀神州之示宜於七月然感生帝與崑崙神州之說不見於經又分郊以異於丘別感生之禮以異於五帝王肅嘗攷之矣要之蒼璧禮天冬至之郊也四圭有邸非必冬至之郊也黃琮禮地夏至之祭也兩圭有邸非必夏至之祭也冬至用蒼璧夏至用黃琮牲幣亦如之所謂牲幣各放其氣之色是也非冬至則四圭非夏至則兩圭而牲幣蓋用駢黝矣所謂陽祀

用駢牲陰祀用黝牲是也禮神之玉蓋皆植於神位之前書曰植璧秉圭是也或曰大司樂言樂六變八變然後神示可得而禮又言歌黃鍾太簇之類以祀天神地示則禮之固在降神之後祀之又。在禮之之後璧琮禮天地四圭兩圭祀天地蓋皆一祭兼用之也是不然何則青圭禮東方赤璋禮南方白琥禮西方玄璜禮北方則四方有禮玉無。祀玉圭璧以祀日月星辰璋邸射以祀山川則日月星辰山川有祀玉無禮玉周官之書雖或簡略不應如是之缺也然則祀之乃所以禮之康成以

祀為禮其神於義或然書曰弘璧在西序爾雅曰
 璧大六寸謂之瑄漢郊祀志言皇帝始郊見泰一
 雲陽有司奉瑄玉蓋與周之禮天者異矣然則冬
 至禮天必以璧何也蒼春天之色圜鍾春律之管
 樂以圜鍾玉以蒼璧而牲幣皆蒼以冬至者陽氣
 之始故也

兩圭有邸

黃琮

大宗伯曰黃琮禮地典瑞曰兩圭有邸以祀地旅
 四望主人兩圭五寸有邸以祀地旅四望爾雅曰

邸謂之抵鄭氏謂四圭有邸中央為璧圭末四出
 兩圭有邸儻而同邸圭璧者圭其邸為璧賈公彥
 曰四圭兩圭及下璋邸皆言邸鄭皆以邸為璧圭
 璧不言邸故鄭還以邸解璧也然璧天象也祀天
 則四圭邸璧琮地象也祀地必兩圭邸琮日月星
 辰天類也必一圭邸璧山川地類也必一璋邸琮
 謂地與山川皆邸璧非所稱也四圭則無所不達
 尺有二寸天之備數也兩圭則能地而已五寸天
 地之中數也玉人言玉之制其長不過大圭之三
 尺其短不過瑁圭之四寸由四寸而上之則祀地

禮書 卷五十四 三
之兩圭祀日月星辰之圭璧宗后之駟琮皆五寸
侯伯之信圭躬圭巡守之邊璋起軍治兵之牙璋
中璋王之駟琮聘女之穀圭諸侯聘女之大璋皆
七寸規聘之瑑圭璋享夫人之瑑琮皆八寸公之
桓圭象德之琬圭除慝易行之琰圭享天子之璧
琮巡守之大璋皆九寸璧羨度尺而鎮圭四圭裸
圭大琮玉案皆十有二寸土圭尺有五寸則大圭
三尺三寸之道也土圭尺有五寸夏至之景也其
餘長短不倫各有所稱豈苟異哉

圭璧

典瑞圭璧以祀日月星辰璋邸射以祀山川以造
贈賓客公羊傳曰璋判白則璋於圭璧半於兩圭
兩圭半於四圭以禮有隆殺故玉有等衰也先王
以大采朝日少采夕月日月星辰有合祭有異祭
有正祭有禱祈其禮雖不一而用圭璧一也

璋邸射

典瑞璋邸射以祀山川以造贈賓客玉人璋邸射
素功以祀山川以致稍餼王制曰五嶽視三公四
瀆視諸侯書大傳曰其餘山川視伯小者視子男
周禮諸侯爲賓諸臣爲客山川賓客等衰雖除其

禮書卷第十四
四
祀與造贈用邸射一也。賓至致殮如致積致饗致贈如將幣聘賓所過之邦餼之以其禮所聘之邦則卿致館宰夫朝服設殮賓既聘享君使卿韋弁歸饗餼夕夫人使下大夫韋弁歸禮蓋於是時用璋邸射歟。璋邸射素功以其刮摩之功略也。鄭氏以素功爲無瑑飾若然是四圭圭璧之類有瑑飾乎。玉人大琮大璋中璋皆射四寸牙璋亦射四寸特璋邸射不言寸數其詳不可以考。

青圭

赤璋

白琥

玄璜

大宗伯以蒼璧禮天以黃琮禮地青圭禮東方赤璋禮南方白琥禮西方玄璜禮北方蓋璧圓以象天而天以始事爲功故以蒼琮方以象地而地以終功爲事故以璜東生物之方也故圭銳以象春西殺物之方也故虎嚴以象秋南正陽也陰居其半故璋以半圭北正陰也陽居其半故璜以半璧觀禮方明東方圭南方璋西方琥北方璜天府季冬陳玉以貞來歲之媿惡龜有天地四方玉有六

禮記卷之十四
器皆其類也。六玉之制不同，而虎特取其形者，以形成於秋故也。古者鹽爲虎形，以示武敵爲虎形，以止樂亦此意歟。然則禮神則璧琮重於圭璋，圭璋無間於琥璜，朝聘則圭璋重於璧琮，而璧琮重於琥璜而已。何也？圭璋二王之後，所以享王與后也。璧琮五等諸侯所以享王與后也。琥璜子男所以享諸侯者也。又圭璋特達，不加於束帛。琥璜將送酬爵而已。此六玉輕重之別也。至於禮神則上下四方各象其類以求之，與朝聘之禮異矣。昔成王賜伯禽以夏后氏之璜，昭三年左明堂位曰：大璜天子之器，則陽虎所竊之寶。杜預所謂大璜是也。公羊曰：璋判白，誤矣。昭公疾，賜子家子雙琥。公薨，子家子反，賜於府人，則雙琥亦魯之所寶也。說文曰：琥，發兵瑞玉爲琥。又白虎通曰：璜以徵召，然先王之時，發兵用牙璋，徵守以鎮圭，召人以瑗。後世發兵乃用銅虎符，不知說文白虎通何據而言然。

牙璋

中璋

典瑞曰：牙璋以起軍旅，以治兵。守玉人曰：牙璋中璋七寸厚寸，以起軍旅，以治兵。守鄭司農曰：牙璋

禮書卷第五十四
瑑以為牙牙齒兵象故以牙璋發兵鄭康成曰牙璋中璋皆有鉏牙之飾於琰側先言牙璋有文飾也賈公彥曰軍多用牙璋軍少用中璋中璋亦有鉏牙但牙璋文飾多故得牙名而先言也春秋之時宋司馬請瑞哀十四年左以命其徒攻桓氏杜預曰瑞符節以發兵魏有兵符漢有銅虎符以發郡國兵豈牙璋之類歟白虎通曰璋位南方南方陽極而陰生兵亦陰也故以兵起於義或然

禮書卷第五十四終

禮書卷第五十五

宋 陳祥道用之 編

明 張 溥西銘 閱

盛 順順伯 叅

圭瓚

璋瓚

大璋

中璋 邊璋

鬱人凡裸玉濯之陳之以贊裸事詔裸將之儀與其節裸玉謂圭瓚璋瓚大喪及葬共其裸器遂埋之遺奠之器與瓚也

典瑞裸圭有瓚以肆先王以裸賓客鄭司農云於圭頭為器可以挹

鬯裸祭詩曰瑟彼玉瓚黃流在中國語之鬯圭以肆先王裸先王祭也玄謂肆解牲體以祭因以為名爵行曰裸漢禮瓚祭大五升口徑八寸下有槃口徑一尺 玉人裸圭尺有二寸有

璜裸謂始獻酌奠也瓚如槃其柄用圭有流前注 大璋中璋九寸邊璋七寸

射四寸厚寸黃金勺青金外朱中鼻寸衡四寸有纁

天子以巡守宗祝以前馬射琰出者也鄭司農云鼻謂勺龍頭鼻也衡謂勺柄龍

頭也玄謂鼻勺流也凡流皆為龍口也衡古文橫假借字也衡謂勺徑也三璋之勺形如圭瓚天子巡守

有事山川則用灌焉於大山川則用大璋加文飾也於中山川用中璋殺文飾也於小山川用邊璋半文

飾也 王制賜圭瓚然後為鬯未賜圭瓚則資鬯於天子

郊特牲周人尚臭灌用鬯鬱合鬯臭陰達於淵泉灌

以圭璋用玉氣也既灌然後迎牲致陰氣也明堂位

曰灌用玉瓚大圭祭統曰君執圭瓚裸尸大宗執璋

瓚亞裸大宗亞裸君夫 詩棫樸曰濟濟辟王左右奉

璋箋云璋璋瓚也祭祀之禮王裸以圭瓚諸臣助之 旱麓曰瑟彼玉瓚黃流

在中玉瓚圭瓚也黃金所以飾流鬯也九命然後錫以秬鬯圭瓚箋云瑟潔鮮貌黃流秬鬯也圭瓚

之狀以圭為柄黃金為勺青金為外朱中央 江漢曰

圭瓚謂之玉瓚黃金所以飾流鬯可知矣

釐爾圭瓚秬鬯一卣告于文人卣器也九命錫圭瓚文人文德之人也箋

云王賜召虎以鬯酒一尊使以祭其宗廟告其先祖謂有德美見記也正義曰秬鬯一卣者祭時在夔未祭在卣賜時未 書文侯之命曰平王錫晉文侯秬鬯

祭故卣盛之 圭瓚又曰用賚爾秬鬯一卣魯語魯饑文侯以鬯圭

與玉磬如齊告羅白虎通言九錫之禮曰孝道備者

禮書 卷五十五 三
錫以秬鬯圭瓚宗廟之盛禮也。圭以象德，金以配情。芬香條鬯以通神靈，玉飾其末，君子之性，金飾其中。君子之道，金者和之至也，玉者德美之至也，鬯者芬香之至也。君子有玉瓚秬鬯乎？鄭氏釋小宗伯云：天子圭瓚，諸侯璋瓚，既不得鬯，則用薰。故王度記云：天子以鬯，諸侯以薰。

圭以象陽之生物，璋以象陰之成事。王之肆先王禮賓客，以裸。圭、后之亞裸，與王之巡守，以裸。璋，此王與后陰陽尊卑之分。而宗廟賓客山川內外隆殺之辨也。裸，圭尺有二寸，陽以偶成也。大璋中璋

九寸，邊璋七寸，陰以奇立也。圭璋其柄也，瓚其勺也。柄則圭璋純玉爲之，勺則玉多石少者可矣。鄭康成許慎所謂瓚四玉一石是也。圭瓚璋瓚則玉爲之三璋之勺，則飾以金焉。玉人所謂黃金勺，青金外是也。三璋射四寸厚寸，勺鼻寸，衡四寸，有纁則鼻寸，所以流鬯也。衡四寸，勺徑也。纁藉也。圭璋瓚制蓋亦如此。先儒謂凡流皆爲龍口，瓚槃大五升，口徑八寸，下有槃，口徑一尺。然古者有圭瓚璋瓚而無下槃，有鼻而無龍口。先儒之說蓋漢制歟。周之時，典瑞掌裸圭之名物，鬱人掌裸事之儀節。

泣玉鬯則大宗伯贊裸將則小宰而內宰贊后之裸獻大宗伯攝后之載裸此王與后祭祀賓客之裸禮也惟天地之神無所用裸故典瑞裸圭止於肆先王玉人裸圭止於祀廟則天地無裸可知禮曰諸侯賜圭瓚然後為鬯故旱麓詩曰瑟彼玉瓚黃流在中江漢詩曰釐爾圭瓚秬鬯一卣而魯晉之國皆用焉以其有功於民者也祭統所謂君執圭瓚裸尸大宗執璋瓚亞裸鄭曰容夫人有故攝焉此諸侯用圭瓚之禮也周衰禮廢而臧文仲以鬯圭如齊告糴豈知先王所以康周公之意哉書曰王入大

室裸記曰既灌而後迎牲則尸入裸之然後后再裸焉后再裸則大祭祀而已凡小祭祀蓋一裸也內宰大祭祀后裸獻觀周官行人裸侯伯子男一裸則小祭祀一裸可知記言諸侯相朝灌用鬱鬯此亦賜圭瓚者之禮也未賜圭瓚必資鬯於天子

宗廟禮神之玉

大宗伯有禮天地四方之玉典瑞玉人有祀天旅上帝祀地旅四望祀日月星辰山川之玉特於宗廟言裸圭有瓚以肆先王裸圭尺有二寸有瓚以祀廟則裸圭非禮先王之玉也賈公彥釋大宗伯

謂天地有神玉無鬱鬯宗廟有鬱鬯神玉裸用圭璋用玉氣也則宗廟之玉裸圭而已然考之大宰祀五帝贊玉幣爵之事祀神示享先王亦如之大宗伯祀大神享大鬼祭大示泣玉鬯鄭氏皆以玉爲禮神之玉文書稱周公之禱大王王季文王而植璧秉圭曾子問稱天子諸侯將出以幣帛皮圭告于祖廟反必設奠歛幣玉藏諸兩階之間則宗廟之玉非特圭而已且裸以求神及神之格斯然後可得而禮則裸圭非禮神之物也裸之所不用者天地而已其餘裸以圭璋又禮以玉而賓客之

儀猶且裸與造贈異玉况先王乎然則典瑞玉人不言宗廟有禮神之玉者特其文不備耳

穀圭

大璋

典瑞曰穀圭以和難以聘女玉人曰穀圭七寸天子以聘女蓋穀圭以穀爲文以善爲義故可和難以釋仇聘女以納徵也圭貴於璋璋貴於皮天子納徵以穀圭諸侯以大璋士以儷皮此尊卑之所別也然皆玄纁束帛以將之此尊卑之所同也士婚禮納徵玄纁束帛周禮凡嫁子取妻入幣純帛

無過五兩雜記曰納幣一束束五兩兩五尋是也
 蘇秦傳曰錦繡千純犀首傳曰文繡千純裴駟曰
 純端名則周禮所謂純帛者匹帛也鄭氏改純為
 緇與士婚禮玄纁之制不類其說非也考之經傳
 大璋有三爾雅璋大八寸謂之琬玉人大璋中璋
 九寸邊璋七寸射四寸厚寸天子以巡守而諸侯
 聘女之璋如邊璋制亦謂之大璋則九寸八寸皆
 可以大璋命之也

琬圭

琰圭

書曰琬琰在西序典瑞曰琬圭以治德以結好琰
 圭以易行以除慝玉人曰琬圭九寸而纁以象德
 琰圭九寸判規以除慝以易行人曰時聘以結
 諸侯之好殷規以除邦國之慝鄭康成謂琬圭王
 使之瑞節諸侯有德王命賜之及諸侯使大夫來
 聘既而為壇會之使大夫執以命事焉琰圭亦王
 使之瑞節除慝亦於諸侯使大夫來覲既而使大
 夫執而命事於壇調人饑弗辟則與之瑞節而以
 執之鄭康成曰瑞節琰圭也說文曰琰璧上起美
 色也蓋琬圭圓而宛之也琰圭剡而有鋒也圓而

宛之仁也故以治德以結好刻而有鋒義也故以
 易行以除慝琰圭判規則圭上圓而判之與凡圭
 之琰上寸半者異矣康成謂琰圭琰半以上又半
 為瑑飾賈公彥曰判半也又云規明半以上琰至
 首規半以下為瑑飾可知然琬琰之有瑑飾於經
 無見此不可考

禮書卷第五十五終

禮書卷第五十六

宋 陳祥道用之 編

明 張 溥西銘 閱

盛 順順伯 參

璧羨 袤一尺
廣八寸

爾雅曰肉倍好謂之璧典瑞璧羨以起度玉人璧
 羨度尺好三寸以為度鄭司農曰好璧孔也羨徑
 也鄭康成曰羨不圓之貌延其袤一尺而廣狹焉
 蓋璧圓九寸好三寸延其袤為一尺旁各損半寸
 則廣八寸矣說文曰人手卻十分動脈為寸口十

寸為尺周制寸尺咫尋常仞諸度量皆以八之體
 一為法又曰中婦人手長八寸謂之咫周尺也然則
 璧羨袤十寸廣八寸同謂之度尺則周制十寸皆
 為尺矣以十寸之尺起度則十尺為丈十丈為引
 以八寸之尺起度則八尺為尋倍尋為常故黼深
 十寸內方八寸而為嘉量幣長一丈八尺而為制
 幣凡此皆璧羨縱橫之尺然也度心為璧以起之
 則圍三徑一之制又寓乎其中矣起度於璧羨權
 起於駟琮樂起於黃鍾之長則先王制器豈徒然
 哉凡以存天下萬世之法耳

瑑圭 八寸

瑑璋 八寸

瑑璧 八寸

瑑琮 八寸

典瑞曰瑑圭璋璧琮以規聘玉人曰瑑圭璋八寸
 璧琮八寸以規聘又曰瑑琮八寸諸侯以享夫人
 行人合六幣圭以馬璋以皮璧以帛琮以錦琥以
 繡璜以黼此六物者以和諸侯之好故鄭康成曰
 五等諸侯享天子用璧享后用琮其大各如其瑞
 二王之後享用圭璋其於諸侯亦用璧琮耳子男

於諸侯則享用琥璜下其瑞也凡二王後諸侯相
 享之玉大小各降其瑞一等及使卿大夫覲聘亦
 如之史記樂書曰情好珍善為之琢磨圭璧以通
 其意蓋玉有朝覲之玉有覲聘之玉有享獻之玉
 禮於朝覲之玉言其所琢桓躬信穀蒲是也覲聘
 之玉言琢而已琢圭璋璧琮以覲聘是也鄭司農曰琢有
圻鄂若夫享獻之玉諸侯以享天子則不琢玉人
 謂璧琮九寸諸侯以享天子是也諸侯以享夫人
 則琢玉人謂琢琮八寸諸侯以享夫人是也覲禮
 侯氏覲天子三享皆束帛加璧禮器曰束帛加璧

尊德也郊特牲曰束帛加璧往德也夫諸侯相朝
 而享夫人以琮聘卿亦享夫人以琮則諸侯享后
 亦必以琮諸侯享王以璧聘卿享君亦以璧則諸
 侯相享亦必以璧玉人言璧琮以享天子則后舉
 矣言琢琮享夫人則璧舉矣鄭氏曰五等諸侯享
 天子用璧享后用琮其大各如其瑞皆有庭實以
 馬若皮用圭璋者二王之後也二王後尊故享用
 圭璋而特之其於諸侯亦用璧琮耳子男於諸侯
 則享用琥璜下其瑞也凡二王後諸侯相享之玉
 大小各降其瑞一等及使卿大夫覲聘亦如之考

之聘禮享君以璧而有庭實與馬特行人合六幣
 言圭以馬璋以皮而圭璋在璧琮之上則圭璋為
 二王後之禮可知公瑞桓圭九寸諸侯享王亦璧
 琮九寸諸侯即公也則璧琮各如其瑞可知公侯
 伯之瑞以圭而享以璧琮下其瑞也子男之瑞以
 璧而享諸侯亦璧非下其瑞也則享用琥璜可知
賈公彥曰子男之臣自享諸侯不得過君蓋用琥璜公享夫人瑑琮八寸使
 卿大夫覲聘亦瑑圭璋璧琮八寸降其瑞一等則
 諸侯相享之玉大小各降其瑞一等及卿大夫覲
 聘亦如之可知賈公彥曰直言覲聘亦如之則聘享皆降一等同玉人言

諸侯以享而不言公言瑑圭璋璧琮而不及公鄭
 氏知其為公何也弁師諸侯之纁旂九就公之纁
 旂也聘禮所以朝天子圭與纁皆九寸公之圭纁
 也禮之所言舉尊以明卑多矣奚獨玉人然哉聘
 禮曰凡四器者惟其所寶以聘可也則圭璋璧琮
 之類惟其所寶者而已此又先王權於禮者也楚
 遠敵疆曰朝聘有圭享覲有璋蓋朝聘之禮嚴於
 享特聘之禮重於覲覲故圭璋所用如此然諸侯
 之臣聘后夫人以璋二王之後享王以圭則啟疆
 之言亦有其大率者也夫圭璋象陰陽之用璧琮

象天地之體故天子公侯伯之瑞以圭子男璧聘
卿聘以圭享以璧琮又圭璋特達璧琮有幣則圭
璋貴於璧琮矣至於禮神各以所象求之此璧琮
又重於圭璋

合六幣

圭以馬

璋以皮

璧以帛

玄纁

琮以錦

琥以繡

璜以黼

行人合六幣圭以馬璋以皮璧以帛琮以錦琥以
繡璜以黼何也昔大王之於狄人事之以皮幣繼
之以犬馬終之以珠玉是珠玉重於犬馬犬馬重
於皮幣則合圭以馬合璋以皮宜矣繡黼皆陰功
也繡則五色之全黼則白黑而已是繡備於黼也
則合琥以繡合璜以黼宜矣婚禮納徵以束帛饗
贈送者以束錦聘禮享君夫人以束帛覲以束錦
上大夫與下大夫致賓介饗餼皆以束帛賓介饋
之以束錦食禮君侑幣以束帛大夫相食以束錦

是帛質於錦也則合璧以帛合琮以錦宜矣圭東方也馬動物也璋南方也皮文物也璧天象也天事實故以帛琮地象也地事文故以錦琥西方也萬寶之成莫備於此故以繡璜北方也陰陽之辨莫斷於此故以黼此六幣所以合之之意也皮馬不上堂故圭璋特然則璧琮琥璜皆非特達者歟

玉案

十有二寸

說文曰案几屬玉人曰案十有二寸棗案十有二列諸侯純九大夫純五夫人以勞諸侯鄭司農曰案玉案也鄭康成曰玉飾案也夫人王后也記時

諸侯僭稱王而夫人之號不別是以同王后於夫人也玉案十二以為列王后以勞諸侯也諸侯皆九列聘大夫皆五列則十有二列者勞二王之後也聘禮夫人使下大夫勞以竹籩方玄被纁裏有蓋其實棗烝桌擇則棗桌實之器乃加於案也然玉人所言皆玉器非玉飾之器則所謂案者非玉飾者也酒正漿人有后夫人致飲于賓客之禮則是賓客之禮王夫人預焉非必記時諸侯夫人與王后同號也

環

爾雅曰肉好若一謂之環春秋傳曰子見南子環
 佩璆然又曰魯公賜仲環賜子家子一環一璧又
 曰宣子有環其一在鄭商左昭十六年晉語夷吾在梁
 驪姬使奄楚以環釋言荀子曰絕人以玦反絕以
 環范甯釋穀梁亦曰君賜之環則還賜之玦則往
 蓋環之為物或施於佩或施於反絕佩環則不佩
 玦故晉獻公佩申生以金玦所以離之也反絕以
 環不以玦故晉驪姬使奄楚以環釋言於夷吾將
 以還之也韋昭曰然環有以金銀為之其制蓋與
 玉環不同毛公釋詩曰后妃群妾以禮御於君所

女史書其日月授之以環以進退之坐子月辰則
 以金環退之當御者以銀環進之著于左手既御
 著于右手其言蓋有所受也

瑗

爾雅曰好倍肉謂之瑗說文曰瑗大孔璧人君上
 除陛以相引荀子曰召人以瑗說者曰周禮珍圭
 以徵守然則天子以珍圭召諸侯諸侯召臣以瑗
 考之於禮君召臣以三節一節以走一節以趨天
 子徵諸侯則以珍圭非諸侯則以瑗歟

禮書卷第五十六終

人澤多龍以金為節鑄象焉必自以其國所多者於以相別為信明也今漢有銅虎符杜子春云蕩當為帑以函器盛此節門關用符節貨賄用璽節道路用或曰英蕩畫函也

旌節皆有期以反節

門關司門司關也貨賄者主通貨賄之官謂司門司關也貨賄者主通

五涂之官謂鄉遂大夫也凡民遠出至於邦國邦國之民若來入由門者司門為之節由關者司關為之節其商則司市為之節其以徵令及家徒則鄉遂大夫為之節唯時事而行不出關不用節也變司市言貨賄者璽節主以通貨賄非必由市或資於民家焉變鄉遂言道路者容公邑及小都大都之吏皆至治五涂亦有民也符節者如今宮中諸官詔符也璽節者今之印章也旌節今使者所擁節是也將送者執此節以送行者皆以道里日時課如今郵行有程矣以防容姦擅有所通也凡節者法式藏於掌節凡通達於天下者必有節以傳輔之必有節言遠行無也輔之以傳者節為信耳無節者有幾則不達內之傳說所齋操及所適也

正義曰角用犀角者案釋獸云犀似豕注云角在鼻上犀角是角中之貴故知不得用玉者當用犀角案小行人都鄙用管節注謂公之子弟及卿大夫之采地之吏也故用管節與此不同彼諸侯采地亦同用管節亦異內外也山多虎者謂晉國之類也平地多人者若衛國之類也澤多龍者若鄭國之類也輔之者以節使不損壞也案昭二十九年公在郟賜公衍羔裘使獻龍輔於齊侯注龍輔玉名所以輔龍節與此別也太史公本紀漢文帝二年九月初與郡國守相為銅虎符竹使符應劭曰銅虎符第一至第五國家當發兵遣使者至郡國合符符合乃聽受之竹箭五枚長五寸鐫刻篆書第一至第五張晏曰符以代古之圭璋從簡易也鄭引之者小行人達天下之六欲明漢時銅虎符本出於此也

節山國用虎節澤國用龍節皆以金為之道路用旌

節門關用符節都鄙用管節皆以竹為之

此謂邦國

之者使之四方亦皆齋法式以齊等之也諸侯使臣行規聘則以金節授之以為行道之信也虎人龍者

自其國象也。道路謂鄉遂大夫也。都鄙者公之子弟及鄉大夫之采地之吏也。凡邦國之民遠出至他邦他邦之民若來入由國門者門人為之節。由關者關人為之節。其以徵令及家徒鄉遂大夫及采地吏為之節。皆使人執節將之以達之。亦有期以反節管。如今之竹使符也。其有商者通之以符節。如門關門關者與市聯事節可同也。亦所以異於畿內也。凡節有天子法式存於國。正義曰行人亦是適四方之事。言達天下之六節者。據諸侯國而言。掌節所云據畿內也。虎節人節十龍節三者。據諸侯使臣出聘所執。旌節符節管節三者。據在國所用。案掌節注變鄉遂言道路者。容公邑大夫及小都大都之吏。今此旌節中何知不亦容都鄙之吏。而以都鄙吏在管節中者。彼都鄙用角節文在上。當直是都鄙之吏。此都鄙用管節最在下。明都鄙吏在其中。若然邦國之中。都鄙王及吏同用管節矣。云亦所以異於畿內也者。畿內貨賄用璽節。門關用符節。調人凡和難弗辟則與之瑞。畿內同用符節是異也。行人凡其使也。必以旌節。雖道節而以執之。瑞節琰圭也。

路有難而不時必達。比長若徙于他則為之旌節而行。若無授無節。惟園土內之鄉大夫國有大故以旌節輔令則達之。大司徒若國有故則制萬民於王門。令無節者不行於天下。司救凡歲時有天患民病則以節巡國中及郊野。以王命施惠布憲。正月之吉執旌節以宣布于四方。而憲邦之刑禁。掌交掌以節與幣。巡邦國之諸侯及其萬民之所聚。司險若國有故則藩塞阻路而止行者。惟有節者達之。懷方氏達之以節野廬氏。凡有爵及有節者至則為之辟。周語先王為贄幣瑞節以鎮之。敵國賓至關氏以告行。理以

節逆之

八節

玉節

鄭氏曰玉節之制以玉為之以命數為大小

角節

鄭氏曰角用犀角其制未聞

龍節

金為之

人節

金為之

虎節

金為之

符節

管節

旌節

節之為物或以玉或以角或以金或以竹或用以守或用以使或用以民周官掌節之所掌者八玉節也角節也虎節也人節也龍節也符節也璽節也旌節也小行人之所達者六虎節也人節也龍節也旌節也符節也管節也掌節守邦國者用玉節守都鄙者用角節此用以守者也山國用虎節土國用人節澤國用龍節皆金為之此用以使者也門關用符節貨賄用璽節道路用旌節皆有期以反節此用於使與民者也

比長若徙于他則為之旌節以達之此民所執也

行人凡其使也必以旌節此使者所執也析竹為符節全竹為管

節小行人有管節而掌節無之者掌節所掌謂之邦節以輔王命則所謂邦國之使節使邦國者所執也鄭氏謂使卿大夫聘於天子諸侯誤也小行人所達謂之天下之節則所謂龍節人節虎節管節邦國都鄙使者所執非王官所掌也掌節無都鄙之使節以使都鄙者無節特以旌節行之也小行人無璽節以其所掌者使節而貨賄之事不預也然節不持八節六節而已典瑞珍圭以徵守以恤凶荒牙璋以起軍旅琬圭以治德以結好琰圭以除慝以易行穀圭以和難以聘女鄭氏皆以為王使之瑞節則珍

圭牙璋琬圭琰圭穀圭使者為信於所適者也龍節虎節人節符節旌節行人為信於道路者也調人凡和難弗辟則與之瑞節而以執之此琰圭耳則琰圭不特施於使者民亦與之也書康誥曰越小臣諸節春秋之時宋司馬握節以死司城效節於府人而去司馬牛致其邑與珪而適齊杜預曰珪守邑之信則守節不特於邦國都鄙雖官府小臣亦有之也考工記牙璋穀圭七寸琬圭琰圭九寸漢竹使符竹箭五枚長五寸然則先王之節其長蓋亦不過於此若夫旌節之制又加長焉觀蘇武之杖

節則非以寸計之也。漢竹使符銅虎各分其半。右留京師左付郡守。唐符璽郎凡國有大事則出納符節。班其右而藏其左。先王之節其班藏蓋亦如此。然老子曰執左契不責於人則藏其右者非是。

英蕩

掌節凡邦國之使節。山國用虎節。土國用人節。澤國用龍節。皆金也。以英蕩輔之。鄭氏曰使節使卿大夫聘於天子諸侯行道所執之節也。杜子春蕩當作帑。謂以函器盛此節。或曰英蕩畫函考之。於經禹貢揚州貢篠蕩。犬射禮蕩在建鼓之間則蕩

竹也。詩曰二予重英。又曰朱英綠勝則英飾也。節之函以竹爲之而有飾焉。先儒以爲畫函其說是也。言凡邦國之使節則使邦國者之所執非邦國使者之所執也。言皆金也。以英蕩輔之則英蕩之輔主命特虎人龍節而已。非輔其它也。

傳

司關凡所達貨賄者則以節傳出之。鄭氏曰商或取貨於民間無璽節者至關關爲之璽節及傳出之。其有璽節亦爲之傳傳。如今移所過文書節凡通達於天下者必有節以傳輔之。鄭氏曰節爲信

耳傳說所齋操及所適蓋掌節所謂傳者凡通達於天下之節有傳也。司關所謂傳者。璽節之傳也。漢制門關用傳兩行書繒帛分持其一。出入合之。豈古之遺制歟。文帝十二年除之。景帝四年又復之。除之於無虞之時。復之於有警之後。然先王之於天下。先事而事。先患而慮。不為無虞而輕廢。不為有警而後設。

璽

周禮掌節貨賄用璽節。職金掌凡金玉錫石丹青之戒令。受其入征者。辨其物之媿惡。與其數量。揭

而璽之左氏曰。季武子取卞使公冶問襄公璽書。追而與之。鄭杜皆曰。璽印也。漢舊儀曰。璽皆白玉。螭虎細文。曰皇帝行璽。皇帝之璽。皇帝信璽。天子行璽。天子之璽。天子信璽。凡六璽。衛宏漢舊儀曰。諸侯玉印。黃金橐它鈕。文曰璽。列侯黃金印。龜鈕。文曰印。丞將軍黃金印。龜鈕。文曰章。中二千石銀印。龜鈕。文曰章。千石六百石四百石銅印。鼻鈕。文曰印。唐符寶郎武后改符璽郎為符寶郎掌天子八寶及國之符節。釋名曰。印信也。說文曰。執政所持信也。孫堅得傳國璽。方圍四寸。上有鈕文盤五龍。然則漢

天子之璽其方不過四寸諸侯王以下其小又可
知也

禮書卷第五十七終

禮書卷第五十八

宋 陳祥道用之 編

明 張 溥西銘 閱

盛 順順伯 叅

幣帛 帛錦附

儀禮士冠禮乃醴賓以壹獻之禮主人酬賓策帛儷

皮士婚禮納吉用鴈如納采禮納徵玄纁束帛儷皮

婚禮用玄纁者象陰陽備也束帛十端也周禮曰凡嫁子取妻入幣舅饗送者以一獻

之禮酬以束錦送者女家有司也爵至姑饗婦人送

者酬以束錦婦人送者隸子弟之妻妾凡饗速之若異邦則贈丈夫送

者以束錦納徵執皮攝之內文兼執足左首隨入西

上參分庭一在南攝猶辟也兼執足者左手執前兩足右手執後兩足左首象生曲禮賓致命釋外足見文主人

受幣士受皮者自東出于後自左受遂坐攝皮逆退

適東壁賓致命主人受幣庭實所用為節若不親迎則婦入三月然

後婿見主人醴以一獻之禮主婦薦奠酬無幣無幣異於

賓客士相見之禮凡執幣者不趨容彌感以為儀聘禮

宰書幣命宰夫官具及期夕管人布幕于寢門外官

陳幣皮北首西上加其奉於左皮上馬則北面奠于

其前史讀書展幣受享束帛加璧受夫人之聘璋享

玄纁束帛加琮皆如初享獻也既聘又一獻所以厚思惠也帛今之璧色繒也

入境斂旌乃展布幕賓朝服立于幕東西面介皆北

面東上賈人北面坐拭圭遂執展之上介北面視之

退復位退圭圭璋尊不陳之陳皮北首西上又拭璧展之會

諸其幣加于左皮上上介視之退馬則幕南北面奠

幣于其前展夫人之聘享亦如之賈人告于上介上

介告于賓展夫人聘享上介不視貶於君也賈人既拭璋琮南面告于上介上介於是大夫有

以告賓有司展群幣以告群幣私覲及大夫有及郊又

展如初及館展幣於賈人之館如初賓至于近郊君

使卿朝服用束帛勞賓賓用束錦償勞者賓禡奉束

帛加璧享擯者入告出許庭實皮則攝之毛在內內
攝之入設也賓止也賓執梁與湑之西序端不敢食於尊處

主人辭賓反之卷加席主人辭賓反之辭幣降一等

主人從從辭受侑幣再拜稽首主人送幣亦然徹也辭

於主人降一等主人從辭謂辭具卒食徹于西序端

亦親東面再拜降出拜亦拜其他皆如公食大夫之

禮若不親食則公作大夫朝服以侑幣致之覲禮至

于郊王使人皮弁用璧勞侯氏侯氏束帛乘馬僎使

者再拜受侯氏再拜送幣僎使者所以致尊敬也天子賜舍侯

氏再拜稽首受館僎之束帛乘馬饗禮乃歸禮謂食燕也王

或不親以其禮幣致之畧言饗禮五文也掌客職曰上公三饗三食三燕侯伯再饗再食再燕子男一饗

一食士虞禮卒哭明日以其班祔鄭氏曰卒哭成事

而後主各反其廟然則士之皇祖於卒哭亦反其廟

無主則反廟之禮未聞以其幣告之乎太宰之職以

九賦斂財賄九曰幣餘之賦祀五帝及祀之日贊玉

幣爵之事玉幣所以禮神玉與幣各放其方之色祀大神示亦如之朝

覲會同贊玉幣玉獻玉幣諸侯享幣也其合亦如小行人所合六幣小宰凡

祭祀贊玉幣爵之事凡賓客贊裸凡受幣之事大府

幣餘之賦以待賜予職幣掌式法以斂官府都鄙與

凡用邦財者之幣振掌事者之餘財皆辨其物而奠

其錄以書楬之以詔上之小用賜予內宰凡建國佐
 后立市出其度量淳制純制天子巡狩禮所云制幣丈八尺純四狶與大宗
 伯孤執皮帛以蒼璧禮天以黃琮禮地以青圭禮東
 方以赤璋禮南方以白琥禮西方以玄璜禮北方皆
 有牲幣各放其器之色幣以從爵若飲酒有酬幣若國有貞則奉
 玉帛以詔號大賓客受其將幣之齋謂所齋東貢肆獻之財物
 師之職掌立國祀之禮以佐大宗伯立大祀用玉帛
 牲牲立次祀用牲幣立小祀用牲占人凡卜筮既事
 則繫幣以比其命歲終則計其占之中否杜子春云繫幣者以
帛書其占繫之於龜也玄謂既卜筮史必書其命龜之事及兆於策繫其禮神之幣而合藏焉大祀

六曰幣號幣云量幣按人凡賓客受其幣馬賓客之幣馬來朝聘而享

王者凡國之使者共其幣馬使者所用私覲行人凡大國之孤

執皮帛以繼小國之君若有四方之大事則受其幣

聽其辭小行人凡諸侯入王則逆勞于畿及郊勞胝

館將幣為承而擯合六幣圭以馬璋以皮璧以帛琮

以錦琥以繡璜以黼此六物者以和諸侯之好故司

儀將合諸侯則令為壇三成及其擯之各以其禮公

於上等侯伯於中等子男於下等其將幣亦如之其

禮亦如之將幣享也致饗餼還圭饗食致贈郊送皆如將

幣之儀此六禮者惟饗食速賓耳其餘王君親往親往者賓為主人主人為賓君如有故不親饗

食則使大夫以酬幣侑幣致之凡諸侯之交各稱其邦而為之幣以

其幣為之禮象胥凡軍旅會同受國客幣而賓禮之

掌訝待賓客及將幣為前驅道之以如朝曲禮幣曰量幣

檀弓曰伯高之喪孔氏之使者未至冉子攝束帛乘

馬而將之孔子曰異哉徒使我不誠於伯高王制曰

布帛精麤不中數幅廣狹不中量不粥於市錦文珠

玉成器不粥於市月令曰仲春之月祀不用犧牲用

圭璧更皮幣禮運列祭祀瘞繒埋牲曰瘞幣帛曰繒禮器圭璋

特琥璜爵郊特牲曰旅幣無方所以別土地之宜而

節遠邇之期也束帛加璧往德也會子問曰天子將

出告于祖禰以幣帛皮圭諸侯適天子告于社稷宗

廟山川用牲幣又曰君薨犬子生犬祝禪冕執束帛

升自西階升奠幣于殯東几又曰凡告用牲幣反亦

如之牲當為制字之誤也制幣一丈八尺禮器曰大廟之內敬矣君親

牽牲夫人贊幣而從鹿鳴燕群臣嘉賓也既飲食之

又實幣帛筐篚以將其厚意然後忠臣嘉賓得盡其

心矣飲之而有幣酬幣也食之而有幣侑幣也正義曰此解飲食而有幣帛之意言飲有酬賓送酒

之幣食有侑賓勸飽之幣故皆有幣也飲食必酬侑

之者案公食大夫禮賓三飯之後公受宰夫束帛以

侑注云主國君以為食賓殷勤之意未至復發幣以

勸之欲其深安賓也是禮食用幣之意也饗禮亡準

此亦安賓而酬之焉案聘禮云君不親食使大夫朝

服致之以侑幣又曰致饗以酬幣亦如之是親食有

侑幣不親食則以侑幣致之然則不親饗以酬幣致之明親饗有酬幣矣故知飲之而有幣謂酬幣也鄭以飲為饗者以飲食連之若飲食為一則食禮不主於飲若飲為燕禮不宜又在食上且饗食相對之物有食不宜無饗其幣所同公食大夫用束帛以侑其酬幣則無文故聘禮注云酬幣饗禮酬賓勸酒之幣所用未聞也禮幣用束帛乘馬亦不是饗所用幣無正文也禮幣用束帛乘馬謂聘享之幣聘享止用束帛乘馬而已侑幣又用束帛故云亦不是過言諸侯於大夫酬幣不過是也其天子酬諸侯及諸侯自相酬幣不必用束帛乘馬故聘禮注又引禮器曰琬璜爵蓋天子酬諸侯也必疑琬璜為天子酬諸侯之幣者以琬璜非爵名而云爵明以送爵也食禮無爵可送則琬璜饗酬所用也謂饗時酬賓以琬璜將幣耳大夫合六幣琬璜以繡璜以黼則天子酬諸侯以繡而琬璜特之既天子饗諸侯之酬幣與諸侯異則食禮天子侑諸侯其幣不必束帛無文以言之此唯言享食之幣不言燕幣燕禮亦當有焉但今燕禮唯有好貨無幣故左氏昭五年公如晉自郊勞至于贈賄文不顯言之

無失禮又晉韓宣子如楚楚薳啟疆曰宴有好貨殮有陪鼎入有郊勞出有贈賄禮之至也十年晉葬平公鄭子皮將以幣行子產曰喪焉用幣用幣必百兩百兩必千人二十六年申豐以幣錦二兩縛一如瑱適齊定六年陽虎使孟懿子往報晉夫人之幣晉語晉侯使隨會聘于周定王享之餼烝范子曰此何禮也王召士季曰女今我王室之一二兄弟體解節折而飲食之酬幣宴貨以示容合好定王使劉康公聘於魯發幣於大夫晉厲公克楚使郤至告慶于周末將事王叔簡公飲之酒交酬好貨皆厚

交酬飲酒之幣

燕語相悅也。晉羊舌肸聘于周，發幣於大夫及單靖，公靖公享之，儉而敬，賓禮贈餞，視其上而從之。魯語：哀姜至，公使大夫宗婦覲，用幣。用幣與大夫同幣。吳伐越，使來好，聘獲骨焉，節專車，賓好幣於大夫及仲尼，爵之。既徹俎而宴。獻酬禮畢，徹俎而宴飲也。客執骨而問，晉語：王饗禮命公胙，侑。胙，賜祭肉。侑，侑幣。

祭祀用幣之禮

肆師立大祀用玉帛，牲牲立次祀用牲幣，立小祀用牲。先儒謂大祀天地宗廟也，次祀日月星辰社稷五祀五嶽也，小祀司中司命風師雨師山川百

物也。然典瑞祀日月星辰，有圭璧祀山川，有璋邸射，小宰凡祭祀皆贊玉幣爵之事，則用玉。特大祀用幣，不特次祀而已。肆師掌立國祀之禮，而玉帛牲幣用否不同如此。蓋始立國祀與凡祭祀異矣。用幣之禮，其色則天地四方各象其類。大宗伯曰：各放其器之色是也。宗廟則玄纁雜焉。聘禮制玄纁是也。鄭康成曰：玄纁之率，玄居三，纁居二。其數則十端為束。曾子問：執束帛升聘禮，玄纁束是也。其長則丈八尺。天子巡狩禮謂制幣長丈八尺是也。其奠則或於几上，或於几下。曾子問：奠於殯，東几上，聘禮奠于室。

中几下是也其埋則廟階之間。曾子問歛幣玉藏諸兩階之間聘禮埋于西階東是也天子則職之以太宰小宰。周禮太宰小宰贊幣是也諸侯則小宰。曾子問世子生小宰舉幣是也大夫則祀而已。聘禮祝入取幣是也先儒謂有燔瘞之幣有禮神之幣有從爵之酬幣禮神之幣則帛在牲上。若大祀用玉帛牲牲是也從爵之幣則帛在牲下。若牲幣各放其器之色是也然牲幣各放其器之色則禮神者也。酬幣之說於賓客有之不聞祭祀有是禮也。賈公彥曰鄭以獻尸從爵之幣無文故以生人飲酒之禮况之案聘禮饗時有酬幣則獻

尸後酬尸時亦有幣之從爵也

饗食燕用幣之禮

聘禮公於賓一食再饗燕與羞俶獻無常數賓介皆明日拜于朝上介一食一饗若不親食使大夫各以其爵朝服致之以侑幣如致饗無償致饗以酬幣亦如之大夫於賓一饗一食上介若食若饗若不親饗則公作大夫致之以酬幣致食以侑幣公食大夫禮賓三飯公受宰夫束帛以侑西鄉立賓降辭幣升聽命降拜公辭賓升再拜稽首受幣賓降公再拜介逆出賓北面揖執庭實以出公降立上介受賓幣從者

訝受皮若不親食使大夫各以其爵朝服以侑幣致之大夫相食侑幣束錦也若不親食則公作大夫朝服以侑幣致之郊特牲曰禮有以少爲貴者圭璋特琥璜爵左氏曰虢公晉侯朝王王饗醴命之宥皆賜玉五穀馬三匹又曰王饗禮命晉侯宥又曰秦后子享晉侯歸取酬幣終事八反又曰宴有好貨詩鹿鳴曰我有嘉賓鼓瑟吹笙吹笙鼓簧承筐是將序曰旣飲食之又實幣帛筐篚以將其厚意周語晉隨會聘于周定王享之餼烝范子私於原公曰吾聞王室之禮無毀折今何禮也主曰親戚宴饗則有餼烝酬幣宴

貨以示容合好周語王叔簡公飲郤至酒交酬好貨皆厚

食有侑食。故有侑幣。饗有酬爵。故有酬幣。儀禮公食大夫侑以束帛而庭實以皮大夫相食以束錦此食有侑幣也聘禮公於賓若不親食使大夫致之以侑幣致饗以酬幣亦如之大夫於賓若不親饗則公作大夫致之以酬幣致食以侑幣士婚禮舅饗送者以一獻之禮酬以束錦姑饗婦人送者酬以束錦春秋之時虢公晉侯朝王王饗醴命之宥皆賜玉五穀馬三匹秦后子享晉侯歸取酬幣

終事八反魯侯享范獻子莊叔執幣此饗有酬幣也燕禮無用幣之文特鹿鳴之詩燕群臣嘉賓言承筐是將序曰既飲食之又實幣帛筐篚以將其厚意則所謂飲食者燕與食耳此燕有酬幣也孔穎達以飲食爲饗食非詩意也春秋之時定王謂隨會曰酬幣宴貨以示容合好遠啟疆曰宴有好貨又晉郤至告慶于周王叔簡公飲之酒交酬好幣皆厚飲酒宴語相說則古人燕賓未嘗不用酬幣特燕禮之文不備耳禮器曰琥璜爵鄭氏以爲天子酬諸侯諸侯相酬之禮又王饗虢公晉侯皆

玉五穀馬三匹左氏不譏其物而譏其數之不異是天子饗諸侯諸侯相饗酬幣用玉也諸侯食大夫大夫相食以皮帛與錦則侑幣固有差矣然公食大夫三飯而後侑則每舉不侑秦后子享晉侯歸取酬幣終事八反而每爵必酬非禮也酬幣亦謂之侑侑幣不謂之酬故春秋傳享醴皆曰宥以侑者勸酬之通稱也公食大夫飲酒實觶春人凡饗食共其米饌人凡賓客共其簋簋之實饗食亦如之則食非無酒饗非無食特其所主者異耳

禮書卷第五十八終

禮書卷第五十九

宋 陳祥道用之 編

明 張 溥西銘 閱

盛 順順伯 叅

燔瘞

大宗伯以禋祀祀昊天上帝以實柴祀日月星辰以禋燎祀司中司命飆師雨師以血祭祭社稷五祀五岳以狸沈祭山林川澤司巫凡瘞事守瘞鄭氏曰埋性玉也詩曰芄芃械僕薪之禋之文曰圭璧既卒上下奠瘞詩序曰巡狩告祭柴望也書曰至于岱宗柴禮記曰天

子適四方先柴又曰柴于上帝又曰燔柴於泰壇祭天也瘞埋於泰圻祭地也又曰列祭祀瘞繒韓詩外傳曰天子奉玉升柴加於牲上而燔之爾雅曰祭天曰燔柴祭地曰瘞埋祭山曰瘝縣祭川曰浮沉山海經曰懸以吉玉春秋之時晉公子投璧于河鄭駟帶與子上盟用兩圭質于河王子朝用成周之寶珪于河蔡侯及漢執玉而沈

曾子問曰天子將出必以幣帛皮圭告于祖禰遂奉以出反必告設奠卒歛幣玉藏諸兩階之間乃出蓋貴命也君薨而世子生太祝執束帛升奠幣

于殯東几上遂朝奠小宰升舉幣鄭氏曰舉而則下埋之階間則

宗廟之瘞在既事之後矣祭天曰燔柴祭地曰瘞埋又周人尚臭而升煙瘞埋乃臭氣也則天地之燔瘞柴在行事之前矣崔靈恩謂祭天以燔柴為始祭地以瘞血為先賈公彥謂天神中非直有升煙玉帛牲亦有禮神者地示中非直有瘞埋玉帛牲亦有禮神者以為燔瘞在作樂降神之後而禮神又燔瘞之後則燔瘞之與禮神固有二玉二帛二牲矣然記曰禮有以少為貴者祭天特牲帝牛不吉以為稷牛書曰用牲于郊牛二則帝牛與稷

牛凡二而已。謂帝牛有二。殆不然也。音賀循謂燔牲左胖。漢用牲首。唐用牲脅。九箇其制不一。以宗廟之祭考之。升首所以報陽。則天地燔瘞。固用首矣。漢用牲首。蓋禮意也。周官羊人。凡釁積。共其羊。牲大夫。凡祭祀。共其犬牲。伏瘞亦如之。鄭康成曰。積柴。禋祀。燂燎。實柴。鄭司農曰。瘞。謂埋祭。祭地曰瘞。埋則燔瘞。用羊犬矣。此豈施於天地之從祀與。夫次祀小祀者乎。周魏之間。燔柴皆於祭末。郭璞云。祭天既祭。積柴燒之。祭地既祭。埋藏之。恐先王之時。祭祀事畢。亦有燔瘞之禮。其詳不可考也。詩

曰。圭璧既卒。書金。滕稱。周公曰。爾之許我。我其以璧與圭歸。俟爾命。則禮神之玉。其終固燔瘞矣。

守瘞

司巫凡祭事。守瘞。鄭氏云。瘞。謂若祭地。祇有埋牲。玉者。守之者。以祭禮未畢。若有事。然祭禮畢。則去之。其說是也。唐之守瘞者。至於六旬。非古也。

釋幣

聘禮。賓朝服。釋幣于禰。天子諸侯將出告羣廟。大夫祭。有司筵几于室中。祝先入。主人從入。主人在右。再拜。祝告。又再拜。釋幣。制玄纁束。奠于几下。出。玄纁之率。玄居

三朝貢禮云純三尺制四丈八尺主人立于戶東祝立于牖西少頃

示有俟又入取幣降卷幣實于筭埋于西階東又釋

幣于行行者之先其古人之名未聞天子諸侯有常祀在冬大夫三祀日門日行日厲喪禮有毀

宗躡行出于大門則行神之位在遂受命上介釋幣

亦如之如其於覲禮侯氏裨冕釋幣于禰釋幣者告

釋幣如聘大夫將受命釋幣于禰之禮既曾子問曰

君薨而世子生如之何孔子曰啇大夫士從攝主北

面於西階南大祝裨冕執束帛升自西階盡等不升

堂命母哭諸侯之卿大夫所服裨冕絺冕也玄冕也祝聲

三告曰某之子生敢告升奠幣于殯東几上哭降几

於殯東明繼體也遂朝奠反朝夕小宰升舉幣舉而下埋凡

告用牲幣反亦如之牲當為制字之誤諸侯相見必

告于禰道近或可以朝服而出視朝命祝史告于五

廟所過山川山川所不過則不覲禮侯氏將朝王釋

幣于禰聘禮賓將受命釋奠于禰于行皆幣而已則

釋幣猶釋菜耳牲牢酒齊不預也聘禮有司筵几于

室中祝先入主人從入主人在右祝告釋幣制玄纁

束奠于几下出主人立于戶東祝立于牖西又入取

幣降卷幣實于筭埋于西階東覲禮侯氏釋幣于禰

鄭氏謂如聘大夫釋幣于禰之禮既則祝藏其幣歸

禮書 卷五十一
乃埋之於祧西階之東蓋聘賓釋幣于廟故舉幣而埋之侯氏釋幣于行主故舉幣而藏之行主祖之遷主也謂之禰者親之也文王世子所謂公禰與此同意曾子問曰天子諸侯將出必以幣帛皮圭告于祖禰所告蓋有用牲者矣其言止於幣帛皮圭者以其無遷主而奉此以出也曾子問又曰凡告必用牲幣反亦如之肆師凡師甸用牲于社宗則爲位則不用牲者肆師不爲位也蓋道或有遠近禮或有重輕故告有特用幣有兼牲幣非一端也太祝大師宜于社造于祖大會同造于廟宜于社過大山川用事焉反

行釋奠鄭氏引曾子問曰凡告必用牲幣及釋曾子問則改牲幣爲制幣是自惑也孔穎達曰天子諸侯出入有告有祭故告用制幣卿大夫惟入祭而已故聘禮既使而反祭用牲也然禮凡告朔告至必用牲也孰謂天子諸侯之告不皆用牲耶皇氏熊氏謂天子告用牲諸侯不用牲此尤無據告雖或用牲而其他不用牲者多矣若國大貞則奉玉帛而詔號春秋傳曰凡天災有幣無牲月令仲春之月祀不用犧牲用圭璧更皮幣以至晉侯謀以息民魏絳請祈以幣更齊饑孔子請祈以幣玉家語凡此視其事與時而

筐

詩曰不盈頃筐頃筐堅之女執懿筐維筐及筥筐之筥之承筐是將序曰實幣帛筐篚以將其厚意易曰女承筐無實儀禮公食大夫簋實實于筐聘禮夫人使大夫餼賓上介米八筐眾介米六筐記曰凡餼大夫黍稷筐五斛禮記曰蚕則績而蟹有筐文曰具曲植籩筐又曰熬君八筐大夫六筐士四筐毛氏曰筐畚屬說文曰方曰筐圓曰籩蓋筐有頃筐有懿筐有大筐有小筐頃筐其淺者也

懿筐其深者也。大筐實五斛。小筐實績熬幣帛簋實而已。筐正也。其深淺大小雖殊。而其制皆方。

筐

詩序曰實幣帛筐篚。禹貢厥篚玄纁而織文絲綯之類。皆以筐儀禮壘洗之。西皆有筐。又有上筐下筐。膳筐之辨。則上筐在堂。下筐在庭。膳筐特饌。君爵而已。筐之為物。可以盛幣帛。可以盛勺。解。可以盛苴茅。士虞苴刳茅長五寸束之實于筐。可以代昕俎。士虞佐食受肺脊實于筐。可以實黍稷。肆師大朝覲佐儉共設。筐鑿此筐之實黍者也。公食大夫豆實實于壘。簋實實于筐。

禮書 卷五十九
而筐者筐類也其用以實簋實宜矣鄭氏曰筐其
筐字之誤歟不必然也鄭氏又曰筐竹器如笭說
文曰筐如竹篋篋有益是以舊圖筐亦有益

禮書卷第五十九終

禮書卷第六十

宋 陳祥道用之 編

明 張 溥西銘 閱

盛 順順伯 叅

贄儀

書曰三帛二生一死贄大宗伯曰以禽作六贄以等
諸臣孤執皮帛卿執羔大夫執鴈士執雉庶人執鶩
工商執雞膳夫凡祭祀之致福者受而膳之以贄見
者亦如之司約曰治贄之約行人曰蕃國各以其所
貴寶爲贄士相見禮贄冬用雉夏用牯左頭奉之下

大夫相見以鴈飾之以布維之以索如執雉上大夫相見以羔飾之以布四維之結于面左頭如麇執之聘禮賓既將公事復見之以其贄禮記曰凡贄天子鬯諸侯圭卿羔大夫鴈士雉庶人之贄四童子委贄而退野外軍中無贄婦人之贄棋榛脯修棗栗國語曰爲贄幣瑞節以鎮之春秋之時哀姜至莊公使宗婦覲用幣左傳曰男贄大者玉帛小者禽鳥以章物也女贄不過榛栗棗脩以告虔也孟子曰出疆必載質又曰庶人不傳質爲臣則不敢見諸侯荀卿稱周公曰吾所執贄而見者十人還贄而相見者三十人

禮云無辭不相接也無禮不相見也欲民之無相瀆也又云君子於其所尊不敢質也故貴至於邦君賤至於庶人以至婦人童子相見不依贄不足以爲禮贄而不稱德不足以爲義此玉帛禽鳥榛栗棗脩之用所以不一也儀禮士於士無辭贄有還贄大夫於士無還贄終辭贄君於其臣則受之於外臣則使僮還之大夫於常爲臣者亦然士贄授受於庭貴者授於堂大夫士於君壻於舅則奠摯士常臣於大夫亦奠摯左傳言委贄爲臣荀卿言錯質之臣童子於所奠則委贄此禮之殺也周官膳夫祭祀致福

禮書 卷六
者受而膳之以贄見者亦如之則受之所以納其德也膳之所以用其德也然膳夫之所受膳者特禽鳥而已若玉帛則非膳夫之所受也聘禮賓見主君以圭璋不以贄訝者訝賓亦不以贄及賓即館訝將公事乃見之以其贄賓既將公事復見之以其贄

天子無客禮於天下而有贄禮於鬼神禮記凡贄天子鬯周禮鬯人凡王帛臨共介鬯則天子之鬯以介致之而已鄭氏引檀弓曰臨諸侯畛於鬼神

曰有天王其父此王適四方舍諸侯祖廟祝告其神之辭介於是進鬯其說也是也然以此爲檀弓之文誤也天子宗廟之灌以圭瓚巡狩之灌以大璋中璋邊璋則贄鬯之器蓋圭璋也天子之贄不特鬯耳其執鎮圭以朝日猶諸侯執圭璧以朝君皆贄瑞也

皮帛

虎皮

豹皮

孤

王之孤飾
贄以虎

公之孤飾
贄以豹

希冕

書之言贄有三帛周禮言贄亦三帛周禮之三帛則王與公之孤諸侯適子之未誓者書之三帛孔安國以為諸侯世子執纁公之孤執玄附庸之君執黃其言雖無經見然天子巡狩卿大夫士皆以贄見於方岳之下附庸宜亦有贄矣孔氏之說蓋有所受之也鄭氏以為高陽氏之後用赤纁高辛氏之後用黑纁其餘諸侯皆用白纁然二氏之與諸侯贄以五玉而已其謂用纁誤也

大宗伯射人孤執皮帛典

命曰凡諸侯之適子未誓則以皮帛繼子男公之孤四命以皮帛眠小國之君行人曰凡大國之孤執皮帛以繼小國之君然則古者制幣其長丈有五玉人曰繼子男執皮帛

八尺其束十端其色或素或玄纁故婚禮納徵玄纁束帛聘禮釋幣與享大夫亦玄纁束帛享君束帛則素而已周禮三帛之色不可以考觀天子之卿大夫飾羔鴈以纁諸侯之卿大夫飾羔鴈以布則天子之孤與公之孤其贄帛之色宜不同矣郊特牲曰虎豹之皮示服猛也鄭氏謂天子之孤飾贄以虎皮公之孤飾以豹皮理或然也士婚納禮徵奉帛於堂實皮於庭攝之內文兼執足左首隨入西上參分庭一在南賓致命釋外足見文主人受幣士受皮者自東出于後自左受遂坐攝皮逆退

禮記 卷六十一
適東壁聘禮致享亦奉玉帛於堂實皮於庭攝之
毛在內賓致命張皮士受皮者自後右客賓出當
之坐攝之公側授宰幣皮如入右首而東孤之贊
禮蓋亦類此以皮不可以上堂故也

羔

鴈

曲禮曰飾羔鴈者以績士相見禮下大夫相見以
鴈飾之以布維之以索如執雉上大夫相見以羔
飾之以布四維之結于面左頭如麇執之先儒謂
飾以績者天子之卿大夫也飾以布者諸侯之卿

大夫也諸侯之卿大夫以布則士以下無布矣昔
魯侯會晉師于瓦范宣子執羔趙簡子中行文子
皆執鴈魯於是始尚羔蓋魯禮之失至此乃復正
也昌氏春秋言得伍員者位執珪漢之曹參始封
執帛後遷執圭陳寔父子同時旌命羔鴈成群魏
司空征南將軍與卿校同執羔明帝詔之以執璧
則先王贊禮必歷漢魏其大畧尚存也然周禮三
公一命衮其在朝則服鷩服鷩服鷩則執信圭及
王服鷩冕以大射然後公降服毳冕而執璧魏以
三公執璧爲常禮誤矣

禮書卷第六十終

禮書卷第六十一

宋 陳祥道用之 編

明 張 溥西銘 閱

盛 順順伯 叅

士昏贊鴈

帛有衣被之仁皮有炳蔚之文故孤執之羔有跪乳之禮有群而不黨之義故卿執之進必以時行必以序鴈也故大夫執之交有特別有倫被文以相質死分而不變者雉也故士執之可畜而不散遷者鶩也故庶人執之可畜而不違時者鷄也故

工商執之。士相見禮於雉左頭奉之。於鴈飾之以布。維之以索。如執雉。於羔飾之以布。四維之。結于面左頭。如麇執之。蓋執禽者必左首。雉必左首。而無飾。維鴈有飾。維而亦左首。鴈之飾與羔同。而維與羔異。羔四維而結于面。鄭氏謂繫聯四足交出背上於胸前。之是也。士執雉而昏禮用鴈。以贊不用死。且攝盛故也。觀其所乘者。墨車所冠者。爵弁女衣。必纁。神領必纁。黼脂必用鮮魚。必用鮒。則其攝盛可知。鄭氏謂鴈順陰陽往來。故昏禮用焉。誤也。詩曰。雝雝鳴鴈。旭日始旦。士如歸妻。遄冰未

泮亦謂用鴈。士禮也。賈公彥曰。昏禮無問尊卑。皆用鴈。蓋附會鄭氏而為之說歟。

士雉

膳

士相見之禮。冬用雉。夏用膳。雉不飾以布。以士卑也。不維以索。以用死也。用死與士死制同意。用膳與夏行膳。膳同意。臣之於君。奠贊而不授。所以尊之也。自敵以下。授贊而不奠。所以交之也。壻之見舅。用臣見君之禮。鄭氏謂壻有子道。不敢授也。贊。雉也。蓋壻之親迎。稱賓則贊以鴈。三月然後稱壻。

禮記
故○贊○以○雉○

鷩

鷮

童子贊

周禮庶人執鷩工商執雞禮記言庶人匹鄭氏曰
匹當爲鷩然鷩之爲物有馴擾而無散遷其謂之
匹可也內則曰舒鳧翠爾雅曰舒鳧鷩李巡曰鷩
鴨也野曰鳧家曰鷩然則庶人執鷩非鳧也士相
見禮庶人見於君不爲容進退走孟子曰庶人不
傳質爲臣則庶人見君無贊矣鷩之爲贊特施於

下○其○君○者○也○工○商○亦○然○昔○闕○黨○童○子○將○命○孔○子○譏
之○以○欲○速○成○范○句○謀○晉○軍○天○子○責○之○以○何○知○蓋○童
子○之○禮○衣○不○裳○履○不○絢○服○不○總○聽○事○不○麻○立○則○在
北○坐○則○在○隅○見○先○生○則○從○之○而○不○竝○有○事○走○而○不
趨○及○冠○然○後○奠○贊○于○君○遂○以○贊○見○於○鄉○大○夫○鄉○先
生○是○未○冠○不○預○乎○禮○也○然○或○賢○與○多○聞○不○可○不○進
以○成○人○之○事○故○又○有○童○子○之○贊○焉○其○制○與○成○人○同
所○以○優○其○德○其○委○與○成○人○異○所○以○卑○其○年

野外軍中贊

纓

拾

矢

周官掌客在野在外殺禮曲禮曰野外軍中無贄以纓拾矢可也蓋君子之為禮不以在野在軍而或廢亦不以物不足而求備故以纓拾矢各適其宜而已然不若備物之為善故曰以纓拾矢可也

婦人贄

笄

昏禮婦見舅姑執笄棗栗自門入升自西階進拜奠于席舅坐撫之婦降階受笄服脩升拜奠于席

姑坐舉以授人蓋棗取其赤心榛栗堅實脯脩取其正治士昏禮不言棋榛特牲少牢大夫士之祭亦棗栗而已特籩人有棗栗又有榛實蓋具棋榛棗栗者盛禮也曾莊公使宗婦覲用幣左氏曰男贄大者玉帛小者禽鳥以章物也女贄不過棋榛棗栗以告虔也公羊曰宗婦曷用棗栗云乎服脩云乎蓋棗栗陽也故贄於舅脯脩陰也故贄於姑聘禮夫人使下大夫勞以二竹籩方其實棗蒸栗擇兼執之以進賓受栗大夫二手授栗玉人案十有二寸棗栗十有二列諸侯純九大夫純五夫人

以勞諸侯然則婦人之用棗栗豈特為贄而已哉

禮書卷第六十一終

禮書卷第六十二

宋 陳祥道用之 編

明 張 溥西銘 閱

盛 順順伯 叅

大宗小宗

喪服小記別子為祖繼別為宗繼禰者為小宗有五世而遷之宗宗其繼高祖者是故祖遷於上宗易於下尊祖故敬宗敬宗所以尊祖禰也大傳曰別子為祖繼別為宗繼禰者為小宗有百世不遷之宗有五世則遷之宗百世不遷者別子之後也宗其繼別

禮記 卷六十一
子之所自出者百世不遷者也宗其繼高祖者五世則遷者也有小宗而無大宗者有大宗而無小宗者有無宗亦莫之宗者公子是也公子有宗道公子之公爲其士大夫之庶者宗其士大夫之適者公子之宗道也曲禮曰支子不祭祭必告于宗子文王世子曰五廟之孫祖廟未毀雖爲庶人冠取妻必告死必赴練祥則告宜弔不弔宜免不免有司罰之至于賵賻承舍皆有正焉小記曰支子不祭明其宗也內則曰適子庶子祇事宗子宗婦雖貴富不敢以貴富入宗子之家雖衆車徒舍於外以寡約入子弟猶歸器

衣服裘車馬則必獻其上而后敢服用其次也若非所獻則不敢以入宗子之門不敢以貴富加於父兄宗族若富則具二牲獻其賢者於宗子夫婦皆齊而宗敬焉終事而后敢私祭曾子問孔子曰宗子雖七十無主婦非宗子雖無主婦可也曾子問曰宗子爲士庶子爲大夫其祭也如之何孔子曰以上牲祭於宗子之家祝曰孝子某爲介子某薦其常事若宗子有罪居于他國庶子爲大夫其祭也祝曰孝子某使介子某執其常事其辭于賓曰宗兄宗弟宗子在他國使某辭曾子問曰宗子去在他國庶子無爵而

居者可以祭乎孔子曰祭哉請問其祭如之何孔子曰望墓而為壇以時祭若宗子告死於墓而居祭於家宗子死稱名不言孝身沒而已子游之徒有庶子祭者以此若義也今之祭者不首其義故誣於祭也孔子曰宗子為殤而死庶子弗為後也其吉祭特牲祭殤不舉無所俎無玄酒不告利成是謂陰厭凡殤與無後者祭於宗子之家當室之白尊于東房是謂陽厭昏禮記曰女子許嫁稱字祖廟未毀教于公宮三月若祖廟已毀則于宗室周禮大宰宗以族得民大宗伯以飲食之禮親宗族兄弟小宗伯掌三族之

別以辨親疏其正室皆謂之門子瞽瞍掌諷誦詩世

奠繫

謂帝繫諸侯即大夫世本之屬

小史掌邦國之志奠繫世辨昭

穆諸子掌國子之倅

公卿大夫士之副貳

儀禮喪服為人後者

為其父母報傳曰何以期也不貳斬也特重於大宗者降其小宗也為人後者孰後後大宗宗也曷為後大宗尊之統也禽獸知母而不知父野人曰父母何筭焉都邑之士則知尊禰矣大夫及學士則知尊祖矣諸侯及其大祖天子及其始但之所自出尊者尊統上卑者尊統下大宗者尊之統也大宗者收族者也不可以絕故族人以支子後大宗也適子不得後

大宗女子子為昆弟之為父後者何以亦期也婦人
 雖在外必有歸宗曰小宗故服期也丈夫婦人為宗
 子宗子之母妻傳曰何以服齊衰三月也尊祖也尊
 祖故敬宗敬宗者尊祖之義也宗子之母在則不為
 宗子之妻服也大夫為宗子何以服齊衰三月也大
 夫不敢降其宗也諸侯之子稱公子公子不得禰先
 君公子之子稱公孫公孫不得祖諸侯此自卑別於
 尊者也若公之子孫有封為國君者則世世祖是人
 也不祖公子此自尊別於卑者也是故始封之君不
 臣諸父昆弟封君之子不臣諸父而臣昆弟封君之

孫盡臣諸父昆弟詩曰宗子維城又曰大宗維翰

百夫無長不散則亂一族無宗不離則疎先王因

族以立宗敬宗以尊祖故吉凶有以相及有無得

以相通尊卑有分而不亂親疎有別而不貳儀禮所謂

不貳斬 貴賤有繫而不間文王世子曰雖為 然後

之類 一宗如出乎一族一族如出乎一家一家如出乎

一人此禮俗所以刑而人倫所以厚也蓋公子不

得禰先君故為別子而繼別者族人宗之為大宗

遠雖至於絕屬猶為之服齊衰三月母妻亦然庶

子不得祭祖故諸兄弟宗之為小宗以其服服之

禮記卷六十一
大宗遠祖之正體則一而已。小宗高祖之正體其別有四。則繼禰者兄弟宗之。繼祖者從兄弟宗之。繼曾祖者從祖兄弟宗之。繼高祖者族兄弟宗之。四世則親盡屬絕而不爲宗矣。然言繼別爲宗。又言繼別子之所自出者。言繼禰爲小宗。又言宗其繼高祖者。則繼別者別子之子也。繼別子之所自出者。卽別子也。繼禰者庶子之子也。繼高祖者五世之孫也。繼禰言其始。繼高祖言其終。繼別言其宗。繼別子之所自出。言其祖。經言繼別子之所自出。而孔穎達言別子之所由出。然則別子所由出。

卽國君也。其可宗乎。穀梁曰。燕周之分子也。分子卽別子也。然別子不特公子而已。有來自他邦而爲卿大夫者。亦謂之別子。有起於民庶而爲卿大夫者。亦謂之別子。

有小宗而無大宗

有大宗而無小宗

有無宗亦莫之宗

諸侯之公子上不得宗君。下未爲後世之宗。必有以統之。故有三者之宗道也。君無適昆弟。使庶昆弟一人爲宗。統公子禮如小宗。故曰有小宗而無

大宗君有適昆弟使之為宗以統公子不復立庶
 昆弟為宗故曰有大宗而無小宗公子一而已無
 公子可宗亦無公子宗之故曰有無宗亦莫之宗
 儀禮曰都邑之士則知尊禰學士大夫則知尊祖
 記曰公子之公為其士大夫之庶者宗其大夫之
 嫡者荀卿曰大夫士有常宗左傳曰大夫有貳宗
 蓋由士以上莫不知尊祖禰知尊祖禰則尊者常
 宗當其為宗則宗子統族人於外主婦統族婦於
 內死雖殤也必喪以成人齒雖七十也主婦不可
 闕居雖異邦也正祭不可舉妻死雖母在也禫不

可屈尊與出嫁者不敢降其服賢者不敢干其任
 貴者不敢擅其祭衆車徒不敢以入其門凡以尊
 正統而一人之情也惟其疾與不肖然後易之故
 史朝言孟縶非人也將不列於宗賀循言奸回淫
 亂則告廟而立其次凡此特義之權耳非其所得
 已者也方周之盛時宗族之法行故常棣行葦之
 美作於上角弓頰弁之刺不聞於下以此治國而
 國有倫以此繫民而民不散則宗子之於天下豈
 小補哉及秦用商君之法富民有子則分居貧民
 有子則出贅由是其流及上雖王公大人亦莫知

有敬宗之道。浸淫後世。襲以爲俗。而時君所以統馭之者。特服紀之律而已。間有糾合宗族。一再傳而不散者。則人異之以爲義門。此名生於不足歟。

辨嫡上

子服父三年。父以尊降服子。朞而長子三年。以其傳重也。孫服祖。朞祖以尊降服孫。大功而服適孫。朞亦以其傳重也。若適子在而適孫死。則祖亦服大功。以其有適子者無適孫也。適子不在而祖死。則適孫亦服三年。以其無適子者。適孫承其服也。然則古者父死立適子。適子死立適孫。上以後先

祖下以收族人。謂之大宗。大宗不可以絕。故無子則族人以支子後之。凡以尊正統而重適嗣也。春秋左氏傳曰。太子有母弟則立之。無則立長年。鈞以擇賢。義鈞則上。又曰。王后無嫡則擇立長年。鈞以德。德鈞以上。以謂太子死而無後。則立嫡子之母弟。以其猶出於嫡室也。無母弟則立庶長。以其不得已而立。妾子之長也。立妾子之長。則無間於貴賤。公羊曰。立適以長。不以賢。立子以貴。不以長。桓何以貴。母貴也。何休曰。禮嫡夫人無子。立右媵子。右媵無子。立左媵子。左媵無子。立嫡姪。嫡子。嫡姪。

禮記 卷六十一
弟無子立右媵姪弟子。右媵姪弟無子立左媵姪
弟子。不識何據云然耶。夫嫡室所以配君子。奉祭
祀者也。媵與姪弟。所以從嫡室。廣繼嗣者也。故內
則以冢子母弟爲嫡子。書以母弟與王父同其重。
則太子死而無後。立太子之母弟可也。均妾庶也。
而立其母之貴者可乎。左氏曰。非嫡嗣。何必弟之
子。又曰。王不立愛。公卿無私。蓋言此也。禮言爲後
者。四有正體而不傳重嫡子。有罪疾是也。有傳重
而非正體庶孫爲後是也。有體而不正庶子爲後
是也。有正而不體嫡孫爲後是也。然傳至嫡孫嫡

孫無後則必立嫡孫之弟。猶太子之母弟也。禮謂
族人以支子後之。蓋自其無弟者言之也。今令文
諸王公侯伯子男皆子孫承嫡者傳襲。若無嫡子
及有罪疾立嫡孫。無嫡孫以次立嫡子。同母弟無
母弟立庶子。無庶子立嫡孫。同母弟無母弟立庶
孫。曾孫以下准此。若然是無嫡孫則舍嫡孫母弟
而上取嫡子之兄弟。無嫡曾孫則舍嫡曾孫母弟
而上取嫡孫之兄弟。嫡子之子宜立而不立嫡子
之兄弟不宜立而立之是絕正統而厚旁支矣。與
禮大宗不可絕云不亦異乎。

辨嫡下

木之正出為本。旁出為枝。子之正出為嫡。旁出為庶。故伐枝不足以傷木。伐其本則木斃矣。廢庶不足以傷宗。廢其嫡則宗絕矣。本固而枝必茂。嫡立而庶必寧。此天地自然之理也。先王知其然。於是貴嫡而賤庶。使名分正而不亂。爭奪息而不作。故子生則冢子接以太牢。庶子少牢。冢子未食而見。庶子已食而見。冠則嫡子於阼階。庶子於房外。死則嫡子斬。庶子期。其禮之重輕。隆殺如此。豈有他哉。以其傳重與不傳重故也。禮曰庶子不祭祖。明

其宗也。又曰庶子不祭禴。明其宗也。史曰父不祭於支。庶之宅。君不祭於臣僕之家。此嫡庶之分。不可不辨也。昔公儀仲子舍孫立子。而擅弓弔。以免司寇惠子舍嫡立庶。而子游弔以麻衰。皆重其服。以譏之。欲其辨嫡庶之分而已。春秋之時。宋宣公舍子與夷立弟。穆公穆公又舍子馮立與夷。而與夷卒於見殺。莒紀公黜太子僕。愛季佗。而卒於召禍。晉獻公殺世子申生。立奚齊。而卒以亂晉。齊靈公廢太子光。立公子牙。而卒以亂齊。蓋嫡一而已。立之足以尊正統。而一人之情。庶則衆矣。立之則

亂正統而啓覬覦之心。宋莒齊晉之君。不察乎此。每每趨禍。良可悼也。或曰。易言大君有命。開國承家。禮言予以馭其幸。則人君之於臣。其所以立者。無嫡庶之間耳。然考之於古。魯武公以括與戲見宣王。宣王立戲。仲山甫曰。天子立諸侯而建其少。是教逆也。主卒立之。其後魯人殺懿公而立括。則魯之禍。宣王爲之也。古之所謂開國承家者。猶之別子爲祖也。爲祖而不爲宗。則其所立者。非爲傳襲其先也。果使之傳襲其先。而不以嫡長。則宣王已事之驗。可不鑒哉。

姓族氏

詩曰。振振公姓。振振公族。書曰。錫土姓。國語曰。司商協民姓。左氏稱衆仲曰。天子建德。因生以賜姓。胙之土而命之氏。諸侯以字爲諡。因以爲族。官有世功。則有官族。邑亦如之。周語曰。伯禹疏川導滯。鍾水豐物。皇天嘉之。祚以天下。賜姓曰姒。氏曰有夏。姒。堯賜禹姓曰姒。謂其能以嘉祉富生物也。祚四岳。國命爲侯。伯賜姓曰姜。氏曰有呂。謂其能爲禹股肱。心膂。以養物豐民人也。姓非天子。不可以賜。而氏非諸侯。不可以命。姓所以繫百世之正統。氏所

以別子孫之旁出族則氏之所聚而已。然氏亦可以謂之姓。故大傳言繫之以姓。又言庶姓別於上。則氏庶姓一也。氏又可以謂之族。故羽父爲無駭。請族。隱公命以爲展氏。則氏族一也。蓋別姓則爲氏。卽氏則有族。族無不同。氏有不同。族故八元。八凱出於高陽氏。高辛氏而謂之十六族。是氏有不同族也。商氏條氏徐氏之類。謂之六族。陶氏施氏之類。謂之七族。宋之華氏。謂之戴族。向氏謂之桓族。是族無不同。氏也。古者或氏於國。則齊魯秦吳氏於謚。則文武成宣氏於官。則司馬司徒氏於

爵。則王孫公孫氏於字。則孟孫叔孫氏於居。則東門北郭氏於志。則三島五鹿氏於事。則巫乙匠陶而受姓命氏。粲然衆矣。秦興滅學而周官小史之職於是繫。世昭穆失其本宗。及漢司馬遷約世本。修史記。因周譜明世家。乃知姓氏之所由出。至晉賈弼有姓氏簿狀。賈希鏡有姓氏要狀。唐李素有肉譜。柳冲有姓系錄。而路敬韋述之徒。傳述不一。推叙昭穆。使不相亂。婚姻得之。而有別親疎得之。而有屬則。姓氏之學。其可忽哉。國語曰。教之世爲之。昭明德而廢幽昏。以休懼其動。則姓氏又可以

示天下後世之勸戒也

禮書卷第六十二終

禮書卷第六十三

宋 陳祥道用之 編

明 張 溥西銘 閱

盛 順順伯 叅

九族

書堯典曰克明俊德以親九族九族既睦平章百姓

以睦高祖 玄孫之親 臯陶謨曰惇叙九族庶明勵翼仲虺之誥

曰志自滿九族乃離詩葛藟刺平王也周室道衰棄

其九族焉九族者據已上至高祖下及玄孫之親 其詩曰終遠兄弟謂

他人父終遠兄弟謂他人母終遠兄弟謂他人昆頰

弁諸公刺幽王也不能燕樂同姓親睦九族其詩曰
 豈伊異人兄弟匪他豈伊異人兄弟甥舅角弓父兄
 刺幽王也不親九族而好讒佞其詩曰兄弟昏姻無
 胥遠矣行葦忠厚也能內睦九族外尊事黃耆其詩
 曰戚戚兄弟莫遠具爾喪服小記曰親親以三為五
 以五為九上殺下殺旁殺而親畢矣已上親父下親
 祖以子親孫五也以祖親
 高祖以孫親玄孫九也

三族

周禮小宗伯掌三族之別以辨親疎其正室皆謂之
 門子掌其禁令三族父子孫人屬之正名小記
 曰親親以三為五以五為九禮記

仲尼燕居曰閨門之內有禮故三族和三族父子孫也士昏

禮請期曰惟是三族之不虞使其也請吉日三族謂
 父昆弟

已昆弟子昆弟虞度也不億度謂卒有死喪此三族
 者已及子皆為服期期服則踰年欲及今之吉也雜
 記曰大功之末史記秦紀襄公二十年法初有三族

之誅張晏曰父母兄弟妻子也
 如淳曰父族母族妻族也前漢張耳傳趙相貫

高曰人情豈不各愛其父母妻子哉今吾三族皆以
 論死豈以王易吾親哉

宗族

周禮大宰宗以族得民宗繼別為大
 宗收族者大宗伯以飲食
 之禮親宗族兄弟賑膳以親兄弟之國甸師王之同

禮書 卷之十三

姓有皐則死刑焉文王世子曰公族有死罪則磬於甸人

司士正朝儀

之位主族故士虎士在路門之右

王族故士故為士晚退留宿衛者未嘗仕雖同族不得在王宮

大僕王

燕朝則正位

燕朝於路寢之庭王圖宗人之嘉事

則燕朝

巾車金路封同姓文王世子庶子之正於公

族者教之以孝悌睦友子愛明父子之義長幼之序

其朝于公內朝則東面北上臣有貴者以齒其登餽

獻受爵則以上嗣庶子治之雖有三命不踰父兄其

公大事則以其喪服之精麤為序雖於公族之喪亦

如之以次主人若公與族燕則異姓為賓膳宰為主

人公與父兄齒族食世降一等其在軍則守於公禰

公若有出疆之政庶子以公族之無事者守於公宮

五廟之孫祖廟未毀雖為庶人冠取妻必告死必赴

練祥則告族之相為也宜弔不弔宜免不免有司罰

之至于賄賂承舍皆有正焉公族其有死罪則磬于

甸人其刑罪則織劓亦告于甸人公族無宮刑公與

族燕則以齒而孝弟之道達矣其族食世降一等親

親之殺而君臣之道著矣公族之罪雖親不以犯有

司正術也所以體百姓也刑于隱者不與國人慮兄

弟也弗弔弗為服哭于異姓之廟為忝祖遠之也素

服居外不聽樂私喪之也骨肉之親無絕也公族無

宮刑不翦其類也大傳上治祖禰尊尊也下治子孫親親也旁治昆弟合族以食序以昭穆別之以禮義人道竭矣同姓從宗合族屬異姓主名治際會繫之以姓而弗別綴之以食而弗殊雖百世而婚姻不通者周道然也親親故尊祖尊祖故敬宗敬宗故收族收族故宗廟嚴坊記君子因睦以合族杖杜詩曰晉人刺其君不親九族左傳曰庶人工商各有分親皆有等衰年文七宋昭公欲去羣公子樂豫曰公族公室之枝葉也不可縱尋斧焉叔向曰公族將卑其宗族枝葉先落根本從而亡也華亥欲代其兄合比為右

師譜之於平公而逐之左師曰汝夫也必亡汝喪而宗室於人何有人亦於汝何有既而華亥果亡

書與詩序皆言九族特周禮小宗伯儀禮士昏禮記仲尼燕居特言三族者三族父子孫也九族高祖至玄孫也三族舉其本九族極其末舉三族則九族見矣白虎通夏侯歐陽何琦如淳之徒以父族四母族三妻族二為九族其說蓋以詩之葛藟刺平王不親九族而言謂他人父謂他人母頌弁刺幽王不親九族而言豈伊異人兄弟甥舅角弓亦刺不親九族而言兄弟婚姻無胥遠矣則所謂

九族者非特內宗而已是惡知詩人之所王者因
 內宗而發哉彼謂父族四者父之昆弟適人者子為三
 昆弟適人者子為二族已女昆弟適人者子為三
 族已女適人者子為四族母族三者母之父母為
 一族母之昆弟為二族母之女昆弟為三族妻族
 二者妻之父為一族妻之母為二族然於母之父
 母則合而為一族妻之父母則離而為二可乎爾
 雅於內宗皆曰族於母妻曰黨而已又禮小功之
 末可以嫁娶妻之黨固無妨於嫁娶昏禮不容慮
 其不虞也然則九族之說當從孔安國鄭康成為

正何則小記曰親親以三為五以五為九上殺下
 殺旁殺而親畢矣此九族隆殺之差也蓋已上親
 父下親子三也以父親祖以子親孫五也以祖親
 曾高以孫親曾玄九也然已之所親以一為三祖
 孫所親以五為七記不言者以父子一體而高玄
 與曾同服故不辨異之也服父三年服祖朞則曾
 祖宜大功高祖宜小功而皆齊衰三月者不敢以
 大小功旁親之服加乎至尊故重其衰麻尊尊也
 減其日月恩殺也此所謂上殺服適子三年庶子
 朞適孫朞庶孫大功適孫傳重者也有適子者無
 適孫則長子在皆為庶孫也

則曾孫宜五月而與玄孫皆總麻三月者曾孫服
曾祖三月曾祖報之亦三月曾祖尊也故加齊衰
曾孫卑也故服總麻此所謂下殺服祖朞則世叔
宜大功以其與父一體故加以朞從世叔則疏矣
加所不及故服小功族世叔又疏矣故服總麻此
發父而旁殺者也祖之兄弟小功曾祖兄弟總麻
高祖兄弟無服此發祖而旁殺者也同父至親朞
同祖爲從大功同曾祖爲再從小功同高祖爲三
從總麻此發兄弟而旁殺者也父爲子朞兄弟之
子宜九月不九月而朞者以其猶子而進之也從

兄弟之子小功再從兄弟之子總麻此發子而旁
殺者也祖爲孫大功兄弟之孫小功從兄弟之孫
總麻此發孫而旁殺者也蓋服有加也有報也有
降也祖之齊衰世叔從子之朞皆加也曾孫之三
月與兄弟之孫五月皆報也若夫降有四品則非
五服之正禮耳

族燕之禮

周禮大宗伯以飲食之禮親宗族兄弟禮記曰若公
與族燕則異姓爲賓膳宰爲主人公與父兄齒族食
世降一等又曰公族無宮刑公與族燕則以齒而孝

弟之道達矣其族食世降一等親親之殺而君臣之道著矣 大傳曰旁治昆弟合族以食序以昭穆別之以禮義人道竭矣常棣燕兄弟也詩曰儋爾籩豆飲酒之飶儋陳飶私也不脫履升堂謂之飶箋云私者圖非常之事若議大疑於堂則有飶禮焉兄弟既具和樂且孺妻子好合如鼓瑟琴王與族宗婦內宗之屬兄弟既翕和樂且湛正義曰飶私釋亦從后於房中兄弟既翕和樂且湛言文孫炎曰飶非公朝私飶酒也周語有王公立飶又曰立成禮烝而已飶既為私不在公朝在路門內也酒肉所陳不宜在庭則在堂矣燕禮云皆脫履乃升堂少儀云堂上無跣燕則有之是燕由坐而脫履明飲立則不脫矣故云不脫履升堂謂之飶知飶禮為圖非常議大疑者以周語云王公之有飶禮將以講事成禮建大德昭大物講事昭物是有所謀矣明圖非常議大疑而為飶禮也周語曰王公立飶則有房烝親親燕饗

則有殺烝又曰飶以顯物燕以合好則飶燕禮異序曰燕兄弟此陳飶者圖非常議大疑乃有飶禮則飶大於燕天子燕宗族之禮云所以知王與族人燕則宗婦內宗從后者湛露曰厭厭夜飲不醉無歸傳曰夜飲私燕也宗子將有事族人皆侍不醉而出是不親也醉而不出是深宗也箋云天子燕諸侯之禮云此假宗子與族人燕為說耳然則天子燕同姓諸侯之禮猶宗子與族人燕則天子燕宗族兄弟為朝廷臣者如宗子於族人可知案特牲饋食禮祭末乃曰徹庶羞設於西序下注云為將饋去之庶羞主為尸非神饌也尚書傳曰宗室有事族人皆侍終日大宗已侍於賓奠然後燕私燕私者何也已而與族人飲也此徹庶羞置西序下者為將以燕飲與然則自尸視至於兄弟之庶羞宗子與族人燕飲於堂內賓宗婦之庶羞主婦以燕飲於房也鄭以彼特牲是宗子之祭禮族人及族婦皆助故經云宗婦執兩籩宗婦贊豆是宗婦及族人俱助宗子之祭及祭末族人既為宗子所燕明宗婦亦主宗婦之燕可知也 湛露天子燕諸侯也詩曰湛湛露斯在彼豐草厭厭夜飲在

宗載考

夜飲之禮在宗室同姓諸侯則成之於庶姓其讓則止正義書傳曰既侍其宗然後得燕

燕私者何而與族人飲飲而不醉是不親醉而不出是不敬與此傳同毛伏俱大儒當各有所據而言也

燕禮曰宵則庶子執燭於阼階上甸人執大燭於庭闈人為燭於門外是兩階門庭皆有燭也

楚茨

詩曰諸宰君婦廢徹不遲諸父兄弟備言燕私箋云祭祀

畢歸賓客之祖同姓則留與樂具入奏以綏後祿爾

之燕所以尊賓客親骨肉也

君壽考同姓之臣燕已醉飽皆再拜稽首曰神乃欲嗜君之飲食使君壽且考此其慶辭

先王之於同姓有時燕焉有因祭而燕焉國語曰

時燕不淫此時燕也詩曰諸宰君婦廢徹不遲諸

父兄弟備言燕私坊記曰因其酒肉聚其宗族以

教民睦此因祭而燕也其禮之詳雖不可考要之

服皮弁服即於路寢王皮弁以日視朝詩刺不能宴同姓而曰有頍者弁則皮

也宰夫為主異姓為賓王與族人燕於堂后帥內

宗之屬燕於房其物備烝所以合好也其食世降

一等所以辨親疏也昭穆以序之所以明世次也

夜飲以成之所以別異姓也若夫几席之位升降

之儀脫屣而坐立監相禮羞庶羞以盡愛爵樂無

筭以盡驩其大率蓋與諸侯燕禮不異諸侯燕族

人與父兄齒雖王之尊蓋亦不以至尊廢至親也

特牲饋食禮祝告利成徹庶羞設于西序下鄭氏

引書傳曰宗室有事族人皆侍終日大宗已侍於
賓奠然後燕私燕私者何也已與族人飲也此徹
庶羞置西序下者為將以燕飲與然則自尸祝至
於兄弟之庶羞宗子以與族人燕飲於堂內賓宗
婦之庶羞主婦以燕飲于房由是觀之燕族之禮
不特天子諸侯而已

族飫之禮

周語定王謂晉隨會曰郊禘之事則有全烝王公立
飫則有房烝禮之立成者為飫親戚燕饗則有饋烝饋烝升體節解
折之俎也今女非他也而叔父使士季實來唯是先
謂之折俎也

王之宴禮欲以貽女余一人敢設飫禘焉夫王公諸

侯之有飫也將以講事成章章章程也建大德昭大物也

大德大功也故立成禮烝而已立成不坐也烝升也飫

以顯物宴以合好顯物示物備也故歲飫不倦時宴不淫敬

王十年萇弘欲城周衛彪傒見單穆公曰萇弘其不

沒乎周詩有之曰天之所支不可壞也周詩飫時所歌也支在也

其所壞亦不可支也昔武王克殷而作詩作此以為

飫歌名之曰支以遺後之人使永監焉夫禮之立成

者為飫昭明大節而已少典與焉其詩樂少章典是威儀少皆類也

以為之日惕其欲教民戒也然則夫支之所道者必

禮書卷六十三
盡知天地之爲也。不然不足以遺後之人。今襄劉欲支天之所壞，不亦難乎？魯語：公父文伯之母祭，悼子康子與焉。胙不受，徹俎不宴，宗不具，不繹，繹不盡，飫則退。昭謂立曰：飫坐曰：宴言宗具，則與繹，繹畢而飲，不盡，飫禮而退，恐有醉飽之失，皆所以遠嫌也。公父文伯之母欲室，文伯饗其宗老，請守龜卜室之。族師亥聞之曰：善哉！男女之饗，不及宗臣，宗室之謀，不過宗人。

古者合族之禮，方其平居無事，則有燕以申好，及其有大疑謀，則有飫以圖事。燕則脫屣升堂坐，而不立其牲體，折節而殺烝，所以致愛。飫不脫屣升

堂立而不坐，其牲體半解而房烝，所以致嚴。周語曰：王公之有飫禮，將以講事成章，建大德，昭大物，故立成禮烝而已。文曰：歲飫不倦，然則飫以圖事，非必歲爲之也。國語言歲飫時，燕蓋明其疏數之異而已。衛彪傒曰：武王克商，作詩以爲飫歌，名之曰支，以遺後之人，使永監焉。以其戒慎尤在於厭飫之時也。公父文伯之母祭，悼子康子與焉。繹不盡，飫而退，則飫非若燕禮之多儀也。

[Faded bleed-through text from the reverse side of the page]

禮書卷第六十四

宋 陳祥道用之 編

明 張 溥西銘 閱

盛 順順伯 叅

冠

周禮大宗伯以冠昏之禮親成男女黨正凡其黨之昏冠教其禮事禮記曲禮曰男子二十冠而字女子許嫁笄而字曾子問曰將冠子冠者至揖讓而入聞齊衰大功之喪如之何孔子曰內喪則廢外喪則冠而不醴徹饌而歸卽位而哭如冠者未至則廢如將

冠子而未及期日而有齊衰大功小功之喪則因喪服而冠除喪不改冠乎孔子曰天子賜諸侯大夫冕弁服於太廟歸設奠服賜服於斯乎有冠醮無冠醴父沒而冠則已冠掃地而祭於禰已祭而見伯父叔父而後饗冠者郊特牲曰冠義始冠之緇布之冠也大古冠布齊則緇之其緜也孔子曰吾未之聞也冠而敝之可也適子冠於阼以著代也醮於客位加有成也三加彌尊喻其志也冠而字之敬其名也委貌周道也章甫殷道也母追夏后氏之道也周弁殷皐夏收三王共皮弁素積無大夫冠禮而有其昏禮古

者五十而后爵何大夫冠禮之有諸侯之有冠禮夏之末造也天子之元子猶士也天下無生而貴者也內則男女未冠笄者雞初鳴咸盥漱櫛緝拂髦總角二十冠始學禮可以衣裘帛舞大夏惇行孝弟博學不教內而不出玉藻始冠緇布冠自諸侯下達冠而敝之可也玄冠朱組纓天子之冠也緇布冠績緜諸侯之冠也皆始冠之冠也小記曰丈夫冠而不為殤雜記大功之末可以冠子可以嫁子父小功之末可以冠子可以嫁子可以取婦已雖小功既卒哭可以冠取妻下殤之小功則不可此皆謂可用吉禮之時父大功卒哭而可以冠子嫁子小功卒

哭而可以取婦已大功卒哭而可以冠子小功卒哭
 而可以取妻必借祭乃行也下殤小功齊衰之親除
 喪而後可以為昏禮凡冠者其時當冠則因喪而冠之也冠義曰冠者禮之始也
 是故古者聖王重冠筮日筮賓所以敬冠事敬冠事
 所以重禮重禮所以為國本也故冠於阼以著代也
 醮於客位三加彌尊加有成也已冠而字之成人之
 道也古者重冠重冠故行之於廟詩甫田曰婉兮變
 兮總角巾兮未幾見兮突而弁兮加冠為成人也儀禮士冠
 禮筮于廟門若不吉則筮遠日如初儀遠日旬之外也前期
 三日筮賓如來日之儀厥明夕為期于廟門之外擯
 者請期宰告曰質明行事夙興設洗陳服側尊一甒

醴在服北主人迎賓乃行三加之禮既冠乃醴賓以
 一獻之禮酬賓束帛儷皮賓出主人送于外門外晉
 語云趙文子冠冠謂以士禮始冠見欒武子武子曰美哉昔
 吾遠事莊主華則榮矣實之不知請務實乎見中行
 宣子宣子曰美哉惜也吾老矣見范文子文子曰而
 今可以戒矣夫賢者寵至而益戒不足者為寵驕見
 卻駒伯駒伯曰美哉然而壯不若老者多矣見韓獻
 子獻子曰戒之此謂成人成人在始與善始與善善
 進善不善蔑由至矣始與不善不善進不善善亦蔑
 由至矣如草木之產也各以其物人之有冠猶宮室

禮記 卷六十四 三
之有墻屋也糞除而已又何加焉見智武子武子曰
成子之文宣子之忠其可忘乎見溫季子季子曰誰
之不如可以求之左氏襄九年晉侯與諸侯伐鄭還
公送晉侯晉侯以公宴于河上問公年季武子對曰
會于沙隨之歲寡君以生晉侯曰十二年矣是謂一
終一星終也國君十五而生子冠而生子禮也君可
以冠矣武子曰君冠必以裸享之禮行之享祭先君以金
石之樂節之以先君之祧處之請及兄弟之國而假
備焉晉侯曰諾公還及衛冠于成公之廟假鍾磬焉
禮也又曰豈如弁髦而因以敝之成二年楚救齊蔡

景公爲左許靈公爲右二君弱皆強冠之荀子曰天
子諸侯十九而冠冠而聽治其教至也賈公彥曰書
金縢云王與大夫盡弁是時成王年十五云與大夫
盡弁則知天子亦十二而冠矣又大戴禮云文王十
三生伯邑考左傳云冠而生子禮也是商之諸侯亦
十二而冠若夏之天子諸侯與商天子亦十二而冠
可知若天子之子則亦二十而冠故禮記祭法云王
下祭殤五又禮記檀弓云君之適長殤車三乘是年
十九已下皆爲殤故二十乃冠矣士旣三加爲大夫
早冠者亦依士禮三加若天子諸侯禮則多矣故大

禮書 卷之十四 四
戴禮公冠篇云公冠四加者緇布皮弁爵弁後加玄冕天子亦四加後當加衮冕矣案下文天子元子猶士天下無生而貴者則天子之子雖早冠亦用士禮而冠案家語冠頌云主太子之冠則天子元子亦擬諸侯四加若然諸侯之子不得四加與三加可知孔穎達釋冠義云諸侯尚四加則天子亦當五加衮冕也家語冠頌邾隱公既即位將冠使大夫因孟懿子問禮於孔子子曰其禮如世子之冠冠於阼者以著代也醮於客位加其有成三加彌尊導喻其志冠而字之敬其名也雖天子之元子猶士也其禮無變天

下無生而貴者故也行冠事必於祖廟以裸享之禮以將之以金石之樂節之所以自卑而尊先祖示不敢擅懿子曰天子未冠即位長亦冠也孔子曰古者王世子雖幼其即位則尊爲人君人君治成人之事者何冠之有懿子曰然則諸侯之冠異天子與孔子子曰君薨而世子主喪是亦冠也已人君無所殊也懿子曰今邾君之冠非禮也孔子曰諸侯之有冠禮也夏之末造也有自來矣今無譏焉天子冠者武王沒成王年十有三而嗣立周公居冢宰攝政以治天下明年夏六月既葬冠成王而朝于祖以見諸侯示

禮書 卷六十四 五
有君也。周公命祝雍作頌曰：祝王辭達而勿多。祝雍辭曰：使王近於民，遠於年，嗇於時，惠於財，親賢而任能。其頌曰：令月吉日，王始加元服。去王幼志，服袞職。欽若昊天，六合是式，率爾祖考，永永無極。此周公之制也。懿子曰：諸侯之冠，其所以爲賓主何也？孔子曰：公冠則以卿爲賓，無介公自爲主，迎賓揖升，自阼立于席北，其醴也則如士饗之，以三獻之禮。既醴，降自阼，諸侯非公而自爲主者，其所以異皆降自西階。玄端與皮弁異朝服，素鞞公冠，四加，玄冕祭，其酬幣于賓，則束帛乘馬。王太子庶子之冠，擬焉。皆天子自爲

主，其禮與士無變。饗食，賓也。皆同。懿子曰：始冠必加緇布之冠，何也？孔子曰：示不忘古。太古冠布，齊則緇之，其綏也。吾未之聞。今則冠而弊之可也。漢孝惠卽位四年而冠。卽位十七孝昭卽位十年加元服。卽位八歲五行志曰：上加元服。後漢志曰：正月甲子，若丙子爲吉日。加元服冠禮曰：成王冠，周公使祝雍曰：辭達而勿多也。祝雍曰：近於民，遠於年，遠於佞，近於義，嗇於時，惠於財，任賢使能，博物記曰：孝昭帝冠，辭曰：陛下擯顯先帝之光耀，以承皇天之嘉祿。欽奉仲春之吉辰，普專大道之郊域，秉率百福之休靈，始加昭明之元服。

推遠冲孺之幼志蘊積文武之就德肅勤高祖之清廟六合之內靡不蒙德永永與天無極獻帝傳曰興平元年正月甲子帝加元服司徒淳于嘉爲賓加賜玄纁駟馬貴人公主卿司隸城門五校及侍中尚書給事黃門侍郎各一人爲太子舍人也獻帝起居注曰建安十八年正月壬子濟北王加冠戶外以見父母給事黃門侍郎劉贍兼侍中假貂蟬如濟北王給之

冠者禮之始事之重也古者尊重事故筮日筮賓行之於廟冠之於阼醮於客位祝之以成德字之以伯仲見於母母拜之見於兄弟兄弟拜之所以賁之爲人子爲人弟爲人臣爲人少之禮爲子而孝爲弟而悌爲臣而忠爲少而順然後可以爲人可以爲人然後可以治人則冠禮其可不重歟二十而冠士禮也天子諸侯則十二而冠故春秋傳曰十二年謂一終一星終也國君十五而生子冠而生子禮也考之經傳文王十三生伯邑考成王十五而弁則十二而冠可知荀卿曰天子諸侯十九而冠失之矣小記曰大夫冠而不爲殤則大夫不待五十而爵者亦不待二十而冠豈天子諸侯

禮書 卷六十四
之冠特先士禮一歲哉士禮始加緇布不忘本也。次加皮弁朝服也。三加爵弁祭服也。不忘本然後能事君能事君然後能事神所謂三加彌尊喻其志者如是而已。若夫諸侯則始緇布冠績綏次加皮弁三加爵弁四加玄冕天子則始加玄冠朱組纓次加皮弁三加爵弁四加玄冕五加袞冕矣。郊特牲言玄冠朱組纓天子之冠緇布績綏諸侯之冠鄭氏皆以爲始冠之冠家語稱成王冠祝雍辭曰去幼志心袞職而賈公彥孔穎達皆言天子當加袞冕則始終之所加與士異也家語曰王太子

之冠亦擬諸侯四加則天子五加可知矣。諸侯四則其子三加可知矣。王太子四加而禮記言天子之元子猶士者非謂加數也。儀禮士冠無裸享之禮無金石之樂而季武子曰君冠必裸享之禮行之金石之樂節之而家語之說亦然。此蓋國君之禮歟。國君自冠有享禮大夫士自冠亦然。曾子問曰父没而冠則已冠掃地而祭於禰。

士冠筮日之儀

士冠禮筮于廟門主人玄冠朝服緇帶素鞶卽位于門東西面有司如主人服卽位于西方東面北

上筮與席所卦者具饌于西塾布席于門中闔西闔外西面筮人執筴抽上韝兼執之進受命於主人宰自右少退贊命筮人許諾右還卽席坐西面卦者在左卒筮書卦執以示主人主人受眊反之筮人還東面旅占卒進告吉若不吉則筮遠日如初儀徹筮席宗人告事畢然則筮必於廟尊其親也廟必於禰親其親也士筮於門而不於堂避其君也筮必面西求諸陰也卦者必居筮之左上其北也聘禮君受聘于先君之禰卿受問于祖廟士冠士昏皆止言廟則凡言廟者禰廟也記曰凡行

事受於禰廟是也若諸侯則冠於祖廟左氏曰以先君之禰處之是也少牢筮甸有一日若不吉則及遠日又筮日如初特牲士冠不言甸有一日而特牲若不吉則筮近日者以士筮甸內大夫以上筮甸外也特牲筮祭同服玄端少牢筮與祭同朝服而士冠主人筮日服朝服冠日服玄端者特牲少牢祭事也筮不可尊於先祖故同服士冠非祭事也筮可尊於子孫故異服也天子諸侯筮於廟堂大夫士筮於廟門此尊卑之辨耳鄭氏謂筮不於堂嫌筮之靈由廟神其說誤也

陳服設筵及加冠之儀

服陳于房東領上北贊者立于房西面上南醴設于房尊篚籩豆上南冠弁執于西坵南上東主人立于東序面西賓立于西序面東冠者未冠既冠面南即席加冠面西醴之西南其降而見母面北其始也賓揖冠者即筵坐贊者坐櫛設纚賓降與升正纚降受弁進容祝而冠之既冠揖之適房服其服又揖之即筵坐櫛纚祝加如初蓋賓盥所以致潔降盥降受冠弁所以致敬始加受冠降一等執者升一等再加降二等三加降三等以服彌尊

故降彌下也始祝棄爾幼志順爾成德再祝敬爾威儀淑慎爾德三祝兄弟具在以成厥德以順成德然後慎德慎德然後能成德也禮記曰五十以伯仲周道然也冠禮既冠而字之曰伯某甫仲叔季者唯其所當賈公彥曰殷質二十為字之時兼伯仲叔季呼之周文二十為字之時未呼伯仲至五十乃加而呼之其說是也

孤子冠

孤子則父兄戒宿冠之日主人紆而迎賓拜揖讓立于序端皆如冠主禮於阼凡拜北面于阼階上

禮書 卷六十四
賓亦北面于西階上答拜若殺則舉鼎陳于門外直東塾北面然則孤子戒宿以父兄而迎拜揖讓不以父兄者以戒宿者非冠日之事冠日迎拜揖讓者冠日之事若殺則舉鼎陳于門外鄭氏曰孤子得申禮盛之父在有鼎不陳於門外賈公彥曰凡陳鼎在外者賓客之禮也在內者家私之禮也父在陳鼎不於門外是在外者爲盛也

庶子冠

庶子則冠于房外南面遂醮焉鄭氏曰房外謂尊東也不於阼階非代也不醮於客位成而不尊也

觀此則孤子之冠雖不言醮位其醮於客位可知

醮醮

士冠禮側尊一甒醴在服北有篚實勺觶角柶脯醢南上徹皮弁冠櫛筵入于戶西南面贊者洗于房中側酌醴加柶覆之面葉賓揖冠者就筵筵西南面賓受醴于戶東加柶面枋筵前北面冠者筵西拜受觶賓東面答拜薦脯醢冠者卽筵坐左執觶右祭脯醢以柶祭醴三興筵末坐啐醴建柶與降筵坐奠觶拜執觶與賓答拜冠者奠觶于薦東降筵北面坐取脯降自西階適東壁北面見于母若不醴則醮用酒尊

于房戶之間兩甒有禁玄酒在西加勺南枋洗有篚
 在西南順始加醢用脯醢賓降取爵于篚辭降如初
 卒洗升酌冠者拜受賓答拜如初冠者升筵坐左執
 爵右祭脯醢祭酒興筵末坐啐酒降筵拜賓答拜冠
 者奠爵于薦東立于筵西徹薦爵筵尊不徹加皮弁
 如初儀再醢攝酒其他皆如初加爵弁如初儀三醢
 有乾肉折俎濟之其他皆如初若不醴謂國有舊俗
 者也曲禮曰君子行禮不求變俗祭祀之禮居喪之
 服哭泣之位皆如其國之故謹修其法而審行之是
 酌而無酬酢曰醢醢亦當為醴正義曰自此已上說
 周禮冠子之法自此已上至取邊脯以降如初說夏
 商冠子之法云若不醴則醢用酒者案上文適子冠
 於阼三加訖一醴於客位是周法今云若不醴則醢


用酒非周法故知先王法鄭解無酌酢曰醢案曲禮
 云長者舉未酌鄭注云盡爵曰醢是醢不專於無酬
 酢者若然醴亦無酬酢不為醢名者但醴大古之物
 自然質無酬酢此醢用酒酒本有酬酢故無酬酢得
 名醢也記曰醢於客位加有成也醢夏商
 之禮士昏禮贊醴
 婦舅姑共饗婦以一獻之禮庶婦則使醢之醴側尊
 一甒無禁無玄酒設于房中而醴冠者於三加之後
 每加必祝故醴辭祝辭三其薦則脯醢而已醢尊兩
 甒有禁玄酒設于房戶之西而醢冠者於每加之後
 而毋加不祝故醢辭三無祝辭其薦則始醢脯醢再
 醢攝酒其他如初再醢有乾肉折俎濟之若殺特豚
 載合升始醢如初再醢兩豆葵菹羸醢兩籩栗脯三

醮加俎濟之如初濟肺而醴用觶醮用爵醴尊之篚亦在房醮之篚則在庭醴則贊者酌受賓賓不親酌故無升降醮則賓親酌酒洗爵故有升降蓋冠必用醴若不用醴則醮焉以醴者太古之物故其禮簡所以示質酒者後世之味故其禮煩所以示文故適子用醴庶子用醮適婦有醴與饗庶婦使人醮之不饗諸侯大夫受賜服於天子歸設奠服賜服於斯乎有冠醮無冠醴是醮輕於醴也士冠若不醴則醮者則冠適子或醴或醮惟其所用耳記曰醮於客位此適子之醮也鄭氏遂以醴為周法醮為夏商法此不可

考特牲少牢牲皆用右胖鄉飲鄉射主人牲用右體少儀大牢少牢則以左肩為歸胙右肩以祭特牲士虞喪祭反吉用左則周之吉禮皆用右也鄭氏釋特豚合升之文謂凡牲皆用左胖不知何據云然

醴賓

既冠乃醴賓以一獻之禮酬賓束帛儷皮贊者皆與贊冠者為介蓋君子之於人勞之必有以禮之故昏禮饗送者鄉飲司正祭禮賓尸冠禮醴賓其義一也士醴賓以一獻之禮公醴賓則三獻之禮故家語曰以鄉為賓其禮則如士以三獻之禮也



禮書卷第六十四終

終

[Faint vertical text columns, likely bleed-through from the reverse side of the page]



[Faint vertical text columns on the left page, mostly illegible due to fading]

